

I. DISPOSICIÓN XERAIS

MINISTERIO DE AGRICULTURA E PESCA, ALIMENTACIÓN E MEDIO AMBIENTE

11577 *Real decreto 597/2016, do 5 de decembro, para a aplicación das medidas do programa de apoio 2014-2018 ao sector vitivinícola.*

O Regulamento (UE) n.º 1308/2013 do Parlamento Europeo e do Consello, do 17 de decembro de 2013, polo que se crea unha organización común de mercados dos produtos agrarios e polo que se derrogan os regulamentos (CEE) n.º 922/72, (CEE) n.º 234/79, (CE) n.º 1307/2001 e (CE) n.º 1234/2007, e o Regulamento (CE) n.º 555/2008 da Comisión, do 27 de xuño de 2008, polo que se establecen normas de desenvolvemento do Regulamento (CE) n.º 479/2008 do Consello, no relativo aos programas de apoio, o comercio con terceiros países, o potencial produtivo e os controis no sector vitivinícola, regulan as disposicións sobre os programas de apoio que os Estados membros deben presentar á Comisión.

O Real decreto 548/2013, do 19 de xullo, para a aplicación das medidas do programa de apoio 2014-2018 ao sector vitivinícola español, recollía o conxunto de disposicións que desenvolven o programa de apoio do sector vitivinícola español para a aplicación do segundo programa de apoio quinquenal presentado polo Reino de España á Comisión Europea para o período 2014-2018.

En función da experiencia adquirida, fíxose preciso realizar diversos axustes, motivo polo cal se aprobou o Real decreto 1079/2014, do 19 de decembro, para a aplicación das medidas do programa de apoio 2014-2018 ao sector vitivinícola.

Nestes momentos, e para axustar a nosa normativa ao Regulamento delegado (UE) 2016/1149 da Comisión, do 15 de abril de 2016, polo que se completa o Regulamento (UE) n.º 1308/2013 do Parlamento Europeo e do Consello no que se refire aos programas nacionais de apoio no sector vitivinícola e se modifica o Regulamento (CE) n.º 555/2008 da Comisión, e ao Regulamento de execución (UE) 2016/1150 da Comisión, do 15 de abril de 2016, polo que se establecen disposicións de aplicación do Regulamento (UE) n.º 1308/2013 do Parlamento Europeo e do Consello no que se refire aos programas nacionais de apoio no sector vitivinícola, resulta necesario proceder a diversas modificacións na práctica totalidade das liñas de axuda, ao mesmo tempo que se suprime a de axudas ao investimento, o que fai preciso, en prol da debida seguranza xurídica, aprobar un novo real decreto.

Por outro lado, a liña de axuda correspondente á medida de investimentos suprímese neste real decreto, xa que o Real decreto 1151/2015, do 18 de decembro, introduciu unha modificación dos artigos 58 e 96 do Real decreto 1079/2014, do 19 de decembro, para que a partir do 1 de febreiro de 2016 o apoio a novos proxectos de investimento no sector vitivinícola se realice a través dos programas de desenvolvemento rural ao abeiro do Regulamento (UE) n.º 1305/2013 do Parlamento Europeo e do Consello, do 17 de decembro de 2013, relativo á axuda ao desenvolvemento rural a través do Fondo Europeo Agrícola de Desenvolvemento Rural (Feader) e polo que se derroga o Regulamento (CE) n.º 1698/2005 do Consello, todo isto sen prexuízo dos compromisos correspondentes a anteriores convocatorias.

Na disposición derradeira cuarta desta norma establécese que a entrada en vigor sexa no día seguinte ao da súa publicación no BOE, aínda que se prevé a súa aplicación desde o 18 de xullo de 2016, ao ser a data de entrada en vigor dos mencionados novos regulamentos da UE. Sen prexuízo disto, é de sobra coñecido polos destinatarios da norma este feito, ao estaren publicados no DOUE do 15 de xullo de 2016 ambos os regulamentos, que xa fixan un prazo de *vacatio legis* de tres días, e por ter informado o

Ministerio de Agricultura e Pesca, Alimentación e Medio Ambiente deste real decreto, de maneira suficiente, as comunidades autónomas e o sector.

O presente real decreto dítase en aplicación da normativa da Unión Europea antes citada e de acordo coa habilitación prevista na disposición derradeira primeira da Lei 24/2003, do 10 de xullo, da viña e do viño.

Na elaboración deste real decreto foron consultadas as comunidades autónomas, ben como as entidades máis representativas dos sectores afectados.

Na súa virtude, por proposta da ministra de Agricultura e Pesca, Alimentación e Medio Ambiente, coa aprobación previa do ministro de Facenda e Administracións Públicas, de acordo co Consello de Estado e logo de deliberación do Consello de Ministros, na súa reunión do día 2 de decembro de 2016,

DISPOÑO:

CAPÍTULO I

Disposicións xerais

Artigo 1. *Obxecto e ámbito de aplicación.*

Este real decreto ten por obxecto establecer a normativa básica aplicable ás seguintes medidas recollidas no Programa de apoio ao sector vitivinícola español 2014-2018, presentado polo Reino de España ante a Comisión Europea de conformidade co disposto no Regulamento (UE) n.º 1308/2013 do Parlamento Europeo e do Consello, do 17 de decembro de 2013, polo que se crea unha organización común de mercados dos produtos agrarios e polo que se derrogan os regulamentos (CEE) n.º 922/72, (CEE) n.º 234/79, (CE) n.º 1307/2001 e (CE) n.º 1234/2007, e no Regulamento (CE) n.º 555/2008 da Comisión, do 27 de xuño de 2008, polo que se establecen normas de desenvolvemento do Regulamento (CE) n.º 479/2008 do Consello, no relativo aos programas de apoio, o comercio con terceiros países, o potencial produtivo e os controis no sector vitivinícola:

- a) Promoción de mercados en terceiros países.
- b) Reestruturación e reconversión de viñas.
- c) Eliminación de subprodutos.
- d) Innovación.
- e) Colleita en verde.

Artigo 2. *Definicións.*

Para efectos da aplicación do presente real decreto entenderase como:

a) Autoridade competente: o órgano competente da comunidade autónoma para a tramitación, resolución e pagamento das axudas a que se refire este real decreto, no seu ámbito territorial, e o Fondo Español de Garantía Agraria como organismo pagador na tramitación, control e pagamento das axudas a que se refire este real decreto de ámbito nacional. Esta definición non se utilizará para os efectos da autoridade competente que debe establecer o requisito de arrinca obrigatoria por motivos sanitarios ou fitosanitarios.

b) Destilador autorizado: toda persoa ou agrupación de persoas que:

1.º Esta autorizada polas autoridades competentes para actuar no marco do artigo 52 do Regulamento (UE) n.º 1308/2013 do Parlamento Europeo e do Consello, do 17 de decembro de 2013, e

2.º Figure debidamente inscrita no rexistro territorial a que se refire o artigo 40 do Regulamento dos impostos especiais, aprobado polo Real decreto 1165/1995, do 7 de xullo.

c) Propietario: a persoa ou agrupación de persoas, con independencia da forma xurídica da agrupación ou dos seus membros, que ten o título de propiedade sobre a parcela onde se encontra a viña.

d) Viticultor: a persoa física ou xurídica, ou agrupación de persoas físicas ou xurídicas, con independencia da forma xurídica da agrupación ou dos seus membros, que cultive a superficie plantada de viña, quer como consecuencia dun dereito de propiedade quer porque ten atribuído un dereito de disposición sobre o cultivo.

e) Parcela de viña: a superficie continua de terreo en que un só viticultor cultiva a vide, formada por un conxunto de recintos cunha ou varias referencias alfanuméricas, representada graficamente no Sistema de información xeográfica de parcelas agrícolas (en diante Sixpac).

f) Produtor: calquera persoa ou agrupación de persoas que producise viño a partir de uva fresca, de mosto de uva, de mosto de uva parcialmente fermentado ou de viño novo en proceso de fermentación, obtidos por eles mesmos ou comprados, ben como calquera persoa ou agrupación de persoas que posúa subprodutos resultantes de calquera transformación de uva distinta da vinificación. Esta definición non se aplicará á medida de innovación.

g) Programa: para os efectos da medida de promoción en mercados de terceiros países, considérase programa o conxunto de accións de promoción coherentes que se desenvolvan nun ou varios terceiros países, cuxo alcance sexa suficiente para contribuír a aumentar a información sobre os produtos en cuestión, ben como a súa comercialización.

h) Acción: para efectos da medida de promoción entenderase por acción calquera das medidas de información e promoción contidas no número 2 do artigo 45 do Regulamento (UE) n.º 1308/2013 do Parlamento Europeo e do Consello, do 17 de decembro, que se recollen no anexo I do presente real decreto. Para os efectos da medida de innovación, enténdese por acción a unidade funcional de execución, cun orzamento definido e data de finalización dentro de cada exercicio Feaga. Para efectos da medida de reestruturación e reconversión de viñas, entenderase por acción cada unha das actuacións especificadas no anexo XII do presente real decreto.

i) Operación: para os efectos da axuda á reestruturación e reconversión, enténdese como operación o conxunto de accións tendentes a conseguir a reestruturación e reconversión dunha superficie de viña determinada e incluída na solicitude dun viticultor.

j) Empresa vinícola: para efectos da medida de promoción, entenderase por empresa vinícola aquela empresa privada que opere principalmente na produción e/ou na comercialización no sector do viño.

k) Arrinca: a eliminación total de todas as cepas que se encontren nunha superficie plantada de vide. Esta arrinca inclúe a eliminación tanto do portaenxerto como da parte aérea da planta.

l) Empresa: para efectos da medida de innovación, aplicarase a definición de empresa do artigo 1 do anexo da Recomendación 2003/361/CE da Comisión, do 6 de maio de 2003.

m) Produtos vitivinícolas: para os efectos da medida de innovación, entenderase por produtos vitivinícolas os mencionados na parte II do anexo VII do Regulamento (UE) n.º 1308/2013 do Parlamento Europeo e do Consello, do 17 de decembro, e que se producen no territorio español.

n) Produtos relacionados cos produtos vitivinícolas: para efectos da medida de innovación, entenderase por produtos relacionados cos produtos vitivinícolas os novos produtos que se obteñan ao utilizar na súa elaboración como ingrediente, ao menos nun 60 por cento da súa composición, un ou varios dos produtos do anexo VII, parte II, do Regulamento (UE) n.º 1308/2013 do Parlamento Europeo e do Consello, do 17 de decembro, e que se producen no territorio español.

o) Desenvolvemento: para efectos da medida de innovación, entenderase por desenvolvemento a aplicación concreta dos descubrimentos conseguidos previamente mediante investigación, antes do emprego dos novos produtos, procesos ou tecnoloxías con fins comerciais. A investigación quedará excluída deste real decreto.

p) Centro de investigación e desenvolvemento: para efectos da medida de innovación, considerarase centro de investigación e desenvolvemento toda entidade, con independencia da súa condición xurídica (pública ou privada) cuxo principal obxectivo sexa realizar investigación e desenvolvemento e explotar os resultados destes mediante o ensino, a publicación ou a transferencia de tecnoloxía.

q) Asociacións temporais ou permanentes de produtores: para efectos da medida de promoción e de innovación, entenderanse por asociacións temporais ou permanentes as agrupacións de produtores, persoas físicas ou xurídicas, públicas ou privadas, as comunidades de bens ou calquera outro tipo de unidade económica ou patrimonio separado que, aínda carecendo de personalidade xurídica, poidan levar a cabo os proxectos ou actividades para os cales se agruparon. Actuarán de conformidade co artigo 11.3 da Lei 38/20013, do 17 de novembro, xeral de subvencións.

CAPÍTULO II

Medidas de apoio

Sección 1.ª Promoción en mercados de terceiros países

Artigo 3. *Ámbito de aplicación.*

A fin de mellorar a competitividade dos viños españois, as accións que se mencionan no artigo 6 poderanse financiar con cargo ao orzamento da Unión Europea nas condicións previstas na presente sección.

Artigo 4. *Tipos de accións e duración dos programas.*

1. A medida mencionada no artigo 45 do Regulamento (UE) n.º 1308/2013 do Parlamento Europeo e do Consello, do 17 de decembro, poderá incluír calquera das accións e actividades relacionadas no anexo I.

2. Estas accións deberanse levar a cabo preferentemente no marco dun programa, tal e como se define no artigo 2.g).

3. Para cada período de programación, os programas poderán ter unha duración máxima de tres anos para un determinado beneficiario nun terceiro país ou rexión dun terceiro país. Non obstante, se os efectos do programa o xustifican, poderase prorrogar unha vez por un máximo de dous anos, ou dúas veces por un máximo dun ano cada prórroga, logo de solicitude, de acordo co previsto no artigo 8.4.

Artigo 5. *Beneficiarios.*

1. Poderán presentar solicitudes para se acolleren ao financiamento das medidas de promoción en terceiros países:

a) As empresas vinícolas.

b) As organizacións de produtores vitivinícolas, asociacións de organizacións de produtores vitivinícolas e organizacións interprofesionais definidas nos artigos 152, 156 e 157 do Regulamento (UE) n.º 1308/2013 do Parlamento Europeo e do Consello, do 17 de decembro, recoñecidas polo Estado membro, ben como as organizacións profesionais e os grupos definidos no artigo 3, número 2, do Regulamento (UE) n.º 1151/2012 do Parlamento Europeo e do Consello, do 21 de novembro de 2012, sobre os réximes de calidade dos produtos agrícolas e alimenticios, e as asociacións temporais ou permanentes de dous ou máis produtores que teñan entre os seus fins o desenvolvemento de iniciativas en materia de promoción e comercialización do viño.

No caso das asociacións temporais ou permanentes de dous ou máis produtores, será de aplicación o establecido nos artigos 61.2 e 64.4 c), último parágrafo do artigo 66.1, artigo 68 e artigo 70.6 do presente real decreto.

c) Así mesmo, e en caso de existir suficiente dispoñibilidade de orzamento após a aprobación dos programas correspondentes aos tipos de beneficiarios antes indicados, poderanse considerar tamén beneficiarios os organismos públicos con competencia legalmente establecida para desenvolver actuacións de promoción de viños españois en mercados de terceiros países.

2. Os beneficiarios deberán demostrar, en función do persoal de que dispoñen e, se for o caso, do tamaño da empresa e da súa experiencia profesional nos últimos anos, que teñen acceso á capacidade técnica suficiente para afrontar as exixencias de comercio cos terceiros países e que contan cos recursos financeiros e de persoal suficientes para asegurar que a medida se aplica o máis eficazmente posible. Deberán, así mesmo, garantir a dispoñibilidade, en cantidade e calidade, de produtos para asegurar a resposta a longo prazo fronte ás demandas que se poidan xerar como efecto da promoción realizada, unha vez concluída.

Artigo 6. *Produtos e países admisibles.*

1. Poderán ser obxecto das accións de información e promoción os produtos de calidade destinados ao consumo directo e detallados no anexo II que contén con posibilidades de exportación ou de novas saídas comerciais en terceiros países e que pertencen a algunha das seguintes categorías:

- a) Viños con denominación de orixe protexida.
- b) Viños con indicación xeográfica protexida.
- c) Viños en que se indique a variedade de uva de vinificación.

2. Considéranse elixibles para realizar accións de promoción todos os países terceiros, sendo prioritarios os mencionados no anexo III.

Artigo 7. *Características das accións e programas.*

1. As accións e programas estarán claramente definidos e especificarán o terceiro país ou países ou rexións do terceiro país ou países a que se dirixen, os tipos de viños que inclúen, as accións e actividades que se pretenden levar a cabo e os custos estimados de cada unha delas.

2. As accións distribuiranse en períodos de doce meses, que comezarán o 1 de xuño de cada ano.

3. As mensaxes basearanse nas calidades intrínsecas do produto e deberanse axustar á normativa aplicable nos terceiros países a que van destinados.

4. No caso dos viños que contén cunha indicación xeográfica, deberase especificar a orixe do produto como parte das accións ou programas de información e promoción.

5. Sen prexuízo do disposto nos números 3 e 4, as referencias ás marcas, se for o caso, poderán formar parte da mensaxe.

6. O órgano colexiado previsto no artigo 10, para favorecer a coherencia e eficacia da medida, poderá establecer anualmente directrices sobre as campañas de información e de promoción, que se regularán polo disposto nesta sección.

Artigo 8. *Presentación de solicitudes.*

1. Os interesados que sexan persoas xurídicas e que reúnan as condicións previstas no artigo 5 presentarán, de maneira electrónica, na forma disposta pola comunidade autónoma ou o FEGA, as súas propostas de accións e programas e a documentación correspondente, a través de calquera dos rexistros e medios previstos no artigo 16 da Lei 39/2015, do 1 de outubro, do procedemento administrativo común das administracións públicas, antes do 15 de febreiro de cada ano.

Así mesmo, e en aplicación do previsto no segundo parágrafo do número 5 do artigo 16 da Lei 39/2015, do 1 de outubro, os interesados persoas físicas que reúnan as condicións

previstas no artigo 5 presentarán as súas propostas de accións e programas e a documentación correspondente na mesma forma prevista no parágrafo anterior.

No caso de que se trate dun grupo de empresas, como unha unión temporal de empresas, ou outro tipo de entidades, a solicitude, que será única para todo o grupo, será presentada pola empresa que teña unha maior porcentaxe de participación dentro do grupo, na comunidade autónoma en que radique a súa sede social.

2. Os organismos públicos de ámbito nacional presentarán as súas solicitudes ante a Dirección Xeral da Industria Alimentaria do Ministerio de Agricultura e Pesca, Alimentación e Medio Ambiente, a través dos mesmos medios e nas condicións establecidas no número 1.

3. As accións e programas presentados deberán conter, ao menos, a información prevista no anexo IV e:

- a) Cumprir o disposto nesta sección.
- b) Respetar a normativa da Unión Europea relativa aos produtos considerados e á súa comercialización.
- c) Reflectir co suficiente grao de detalle todos os requisitos necesarios como para que se poida avaliar a súa conformidade coa normativa aplicable e a súa relación calidade/prezo.
- d) Especificar os medios propios ou externos con que se contará para desenvolver as accións previstas.

4. En caso de solicitar prórroga dun programa, de acordo co artigo 4.3, ademais da documentación prevista nos números 1 e 3 do presente artigo, os interesados deberán presentar un informe de resultados dos dous primeiros anos de execución para a súa avaliación. Este informe conterá, ao menos, información relativa aos efectos no mercado de destino do programa desenvolvido, ademais de detallar as razóns para solicitar a prórroga.

5. Xunto coa solicitude de axuda presentárase unha declaración responsable do solicitante de non ter solicitado nin recibido axudas incompatibles, de acordo co punto III do anexo IV.

6. Os beneficiarios que teñan a intención de xuntar ás súas solicitudes de pagamento certificados dos seus estados financeiros consoante o artigo 15.7 deberán notificalo á autoridade competente no momento da presentación da súa solicitude de axuda. Estes estados financeiros poderán consistir nas contas anuais do beneficiario, en función das obrigacións contables que lles corresponden, segundo a súa personalidade física ou xurídica, ou noutro tipo de documentos.

Artigo 9. *Tramitación das solicitudes e avaliación dos programas.*

1. As comunidades autónomas examinarán as solicitudes canto á súa conformidade con esta sección e, se for o caso, coas directrices elaboradas de acordo co previsto no artigo 7.6, e requirirán aos solicitantes, cando for necesario, a emenda da documentación que sexa precisa e avaliaranas de acordo coas seguintes etapas:

a) Fase de verificación da admisibilidade: comprobarase que as solicitudes cumpren os requisitos do artigo 10 do Regulamento delegado (UE) 2016/1149 da Comisión, do 15 de abril de 2016, polo que se completa o Regulamento (UE) n.º 1308/2013 do Parlamento Europeo e do Consello no que se refire aos programas nacionais de apoio no sector vitivinícola e se modifica o Regulamento (CE) n.º 555/2008 da Comisión. Para isto a documentación deberá estar o suficientemente detallada. As solicitudes que non cumpran estes requisitos non serán admisibles.

b) Fase de priorización: só aplicable aos programas que superaron a fase anterior. A puntuación adxudicárase de acordo cos criterios do anexo V.

2. As comunidades autónomas remitirán ao Ministerio de Agricultura e Pesca, Alimentación e Medio Ambiente, no formato electrónico que se acorde, antes do 15 de

abril, a lista provisoria de accións e programas ordenada por puntos, de acordo co anexo VI, e a puntuación final será a suma das puntuacións obtidas na alínea 1.b).

3. O Ministerio de Agricultura e Pesca, Alimentación e Medio Ambiente examinará e avaliará, de acordo co previsto nos números 1 e 2 do presente artigo, as solicitudes presentadas polos organismos públicos de ámbito nacional.

Artigo 10. *Comisión Nacional de Selección de Programas.*

1. Na Mesa de Promoción Alimentaria, aprobada na Conferencia Sectorial de Agricultura e Desenvolvemento Rural do 19 de febreiro de 2007 e integrada por representantes do Ministerio de Agricultura e Pesca, Alimentación e Medio Ambiente e das comunidades autónomas, constituirase unha comisión nacional de selección de programas (en diante a Comisión Nacional), que estará presidida polo director xeral da Industria Alimentaria, e da cal formarán parte como vogais catro representantes do Ministerio de Agricultura e Pesca, Alimentación e Medio Ambiente designados polo secretario xeral de Agricultura e Alimentación e un representante por cada unha das comunidades autónomas que desexen integrarse.

Actuará como secretario, con voz e voto, un funcionario da Subdirección Xeral de Promoción Alimentaria, designado polo presidente.

2. A Comisión Nacional poderá, para cada exercicio Feaga e a partir das listas provisorias remitidas polas comunidades autónomas, propor á Conferencia Sectorial, segundo proceda:

a) Cando o gasto total previsto nas solicitudes seleccionadas non exceda o límite orzamentario inicialmente asignado a esta medida, a selección da lista dos programas que inclúa só aqueles que superan un limiar mínimo de puntuación, ben como o establecemento deste limiar.

b) Cando o gasto total previsto nas solicitudes seleccionadas exceda o límite orzamentario inicialmente asignado a esta medida:

1.º A selección da lista de programas por orde de puntuación até o límite da ficha financeira para a medida, ou

2.º A selección da lista de programas con aqueles que atinxan un limiar mínimo, proposto para cada exercicio, até o límite da ficha financeira para a medida, ben como o establecemento dese limiar, ou

3.º A selección da lista dos programas que inclúa aqueles que superen a puntuación mínima proposta para cada exercicio, ben como o establecemento do mencionado limiar, que non poderá ser inferior a 25 puntos, e a aplicación dun rateo.

En tal caso, a Comisión propondrá tamén á Conferencia Sectorial a porcentaxe de rateo da axuda, de tal maneira que o orzamento da axuda solicitada resultante da aplicación do dito rateo non poderá ser inferior ao 35 por cento, até esgotar o orzamento da ficha financeira.

3. En caso de empate segundo as puntuacións obtidas no anexo V, serán prioritarios, en primeiro lugar os programas con maior puntuación na alínea 1.a); en caso de continuar o empate, en segundo lugar os de maior puntuación na alínea 2.a), e en terceiro lugar os que teñan máis puntos na alínea 2.c).

Artigo 11. *Resolución.*

1. Unha vez atinxido o acordo de Conferencia Sectorial de Agricultura e Desenvolvemento Rural sobre a lista definitiva das accións e programas seleccionados coa distribución de fondos e as condicións establecidas para estes, as comunidades autónomas ou o Fondo Español de Garantía Agraria, se for o caso, resolverán as solicitudes e notificarán aos beneficiarios. O prazo máximo para a resolución e a notificación do procedemento será de seis meses contados a partir do día seguinte á finalización do prazo de presentación das solicitudes.

Transcorrido o prazo de seis meses sen se ter notificado aos interesados resolución ningunha, estes poderán entender desestimada a súa solicitude de acordo co disposto no artigo 25.5 da Lei 38/2003, do 17 de novembro, xeral de subvencións.

Contra a resolución da comunidade autónoma poderase interpor o correspondente recurso en vía administrativa ou contencioso-administrativa, en función de que non esgote ou si esgote a vía administrativa. Se a resolución corresponde ao FEGA, contra ela poderase interpor recurso de alzada ante o ministro de Agricultura e Pesca, Alimentación e Medio Ambiente.

2. Para o caso previsto no ordinal 3.º da alínea 2.b) do artigo anterior, as resolucións poderán facer referencia á aplicación dun rateo e, en tal caso, cando haxa desistencias ou modificacións autorizadas de acordo co artigo 12, as comunidades autónomas poderán realizar resolucións complementarias conforme o previsto no número 5 do presente artigo.

No caso de resolución positiva, os beneficiarios comunicarán ao órgano competente da comunidade autónoma, ou ao Fondo Español de Garantía Agraria no caso previsto no número 3 do artigo 9, no prazo máximo de dous meses, a aceptación da resolución nos termos establecidos, ben como a xustificación da constitución dunha garantía, de acordo coas condicións previstas no Regulamento delegado (UE) n.º 907/2014 da Comisión, do 11 de marzo de 2014, que completa o Regulamento (UE) n.º 1306/2013 do Parlamento Europeo e do Consello no relativo aos organismos pagadores e outros órganos, a xestión financeira, a liquidación de contas, as garantías e o uso do euro, por un importe non inferior ao 15 por cento do montante anual do financiamento da Unión Europea, a fin de asegurar a correcta execución do programa.

No caso de que o beneficiario, para o exercicio Feaga correspondente, teña varios programas aprobados, o organismo xestor da comunidade autónoma poderá admitir o depósito dunha garantía global que garanta o importe de todos eles, sempre que eses programas sexan xestionados nunha mesma comunidade autónoma.

No caso de os beneficiarios seren organismos públicos, estes estarán exentos de cumprir co requisito de ter que depositar a garantía de boa execución, tal e como establece o Regulamento (UE) n.º 1306/2013 do Parlamento Europeo e do Consello, do 17 de decembro de 2013.

3. A obrigaón, segundo o artigo 66.1 do Regulamento (UE) n.º 1306/2013 do Parlamento Europeo e do Consello, do 17 de decembro de 2013, será a execución do 50 por cento do orzamento correspondente ao programa, tal e como se define no número 4. Por baixo del procederáse á execución total da garantía de boa execución, ademais de non pagar a parte executada independentemente da porcentaxe que sexa.

4. Para efectos do cálculo da dita execución, entenderase por orzamento do programa o dobre da axuda autorizada para o programa obxecto de resolución favorable, unha vez aplicado, se for o caso, o rateo da axuda previsto no número 2.b).3.º do artigo 10, e incluídas as modificacións orzamentarias previstas no artigo 12.3, sempre que estas fosen previamente acreditadas e comunicadas polo beneficiario ao órgano competente.

No caso de que houbese un rateo da axuda e a fin de asegurar a correcta aplicación dos supostos determinados no artigo 12.3 relativo a pequenas modificacións, considerarase como importe da axuda para as distintas accións que compoñen o programa o resultante de aplicar a porcentaxe de rateo do programa a cada unha delas.

5. O máis tardar o 1 de marzo de cada ano, as comunidades autónomas en que se producen desistencias dos beneficiarios cuxa solicitude fose obxecto de resolución estimatoria e modificacións autorizadas de acordo co artigo 12 enviarán a lista de programas revisada de acordo con tales desistencias e modificacións, para os efectos de coñecer os fondos que se liberen.

En tal caso poderase propor á Conferencia Sectorial a repartición deses fondos con ámbito nacional, a fin de mellorar a dotación financeira dos programas que non fosen obxecto de desistencia nin modificación, excepto as determinadas no artigo 12.3. Os criterios de repartición destes fondos serán establecidos pola Conferencia Sectorial para cada exercicio en función das necesidades.

Artigo 12. *Modificación das accións e programas.*

1. Antes da presentación da solicitude de pagamento final, antes dos controis sobre o terreo previos ao pagamento final e, en todo caso, antes da finalización da execución do programa, os beneficiarios poderán presentar modificacións dos programas inicialmente seleccionados, sempre que non comprometan os obxectivos dos programas no seu conxunto, non se modifiquen á alza os orzamentos dos programas, non supoñan cambios na admisibilidade nin variacións da puntuación á baixa, estean debidamente xustificadas, se comuniquen dentro dos prazos fixados polas autoridades competentes e estean autorizadas por elas.

2. Non obstante, poderase permitir que se efectúen de forma automática sen autorización previa do órgano xestor pequenas modificacións dentro do importe da axuda autorizado inicialmente, sempre que se cumpran os requisitos do parágrafo anterior.

3. Para os efectos previstos no número 2, entenderanse como pequenas modificacións, entre outras, os seguintes supostos:

a) As transferencias financeiras entre as accións dun programa xa aprobado até un máximo do 20 por cento do importe inicialmente autorizado para cada acción, sempre que non se supere o importe total da axuda autorizada para o programa.

b) As modificacións á baixa do orzamento do programa dentro do límite do 20 por cento, sempre que sexan debidas exclusivamente a aforros orzamentarios e se executen todas as accións, sendo admisibles mesmo se esas modificacións supoñen unha diminución da puntuación do programa.

Tales circunstancias deberán estar debidamente acreditadas e serán comunicadas ao órgano xestor.

4. As comunidades autónomas comunicarán ao Ministerio de Agricultura e Pesca, Alimentación e Medio Ambiente, antes do 1 de febreiro de cada ano, as modificacións que se produciron e que afecten as anualidades en curso.

5. As modificacións que afecten anualidades non comezadas, no caso de programas plurianuais, deberán ser notificadas, antes do 15 de febreiro de cada ano, ao órgano competente da comunidade autónoma para a súa aprobación, quen, pola súa vez, as comunicará ao Ministerio de Agricultura e Pesca, Alimentación e Medio Ambiente antes do 15 de abril.

Artigo 13. *Financiamento.*

1. O financiamento da Unión Europea das accións contidas no artigo 4.1 do presente real decreto realizarase de conformidade co artigo 4 do Regulamento (CE) n.º 1306/2013 do Parlamento Europeo e do Consello, do 17 de decembro de 2013.

2. A participación financeira da Unión nos programas seleccionados non poderá superar o 50 por cento dos gastos subvencionables. Nos programas de dous ou tres anos de duración o dito límite máximo considérase para cada ano de execución.

3. Só se concederá a axuda máxima do 50 por cento dos gastos subvencionables cando o grao de execución do orzamento do programa, tal e como se define este último no artigo 11.4, obxecto de resolución atinxa, ao menos, o 70 por cento.

Se a execución do dito orzamento se encontra entre o 50 e o 70 por cento, aplicaranse os seguintes tramos de intensidade de axuda aos gastos subvencionables:

a) Un 40 por cento de intensidade da axuda se a execución é maior ou igual ao 65 por cento e menor do 70 por cento.

b) Un 30 por cento de intensidade de axuda se a execución é maior ou igual ao 60 e menor do 65 por cento.

c) Un 20 por cento de intensidade de axuda se a execución é maior ou igual ao 55 e menor do 60 por cento.

d) Un 10 por cento de intensidade de axuda se a execución é maior ou igual ao 50 e menor do 55 por cento.

Non se concederá axuda e executarase a garantía depositada se o grao de execución está por baixo do 50 por cento.

4. A contía máxima de axuda solicitada por beneficiario non poderá superar o 5 por cento do orzamento total destinado á medida regulada nesta sección na ficha financeira do programa de apoio para o exercicio correspondente. Esta limitación só será aplicable aos beneficiarios recollidos na alínea a) do artigo 5, e só no caso de os programas presentados estaren centrados na promoción dunha marca.

5. A achega económica dos beneficiarios poderá proceder de tarifas ou contribucións obrigatorias.

Artigo 14. *Anticipos.*

1. O beneficiario, se non for organismo público, poderá presentar ao organismo competente da comunidade autónoma unha solicitude de anticipo, que poderá chegar ao 80 por cento do importe da contribución da Unión Europea anual.

2. O pagamento dun anticipo subordinarase á constitución dunha garantía a favor do órgano competente da comunidade autónoma, por un importe igual ao 100 por cento dese anticipo, de conformidade co Regulamento delegado (UE) n.º 907/2014 da Comisión, do 11 de marzo.

Artigo 15. *Pagamentos.*

1. Poderase solicitar un único pagamento ou pagamentos intermedios da contribución da Unión Europea anual. As solicitudes referiranse ás accións realizadas e pagadas.

2. Todos os pagamentos deben realizarse a través dunha conta bancaria única dedicada en exclusiva a este fin, salvo as excepcións que poida establecer o órgano competente da comunidade autónoma ou o FEGA no caso de organismos públicos de ámbito nacional.

3. As solicitudes de pagamentos intermedios deberán presentarse ante o órgano competente da comunidade autónoma, ou ante o FEGA no caso de organismos públicos de ámbito nacional, antes de que conclúa o mes seguinte a aquel en que expire cada período de catro meses, a partir do 1 de xuño.

Os pagamentos intermedios e o pagamento do anticipo previsto no artigo 14 non poderán exceder no seu conxunto o 80 por cento do total da contribución da Unión Europea.

4. Unha vez finalizadas as accións de cada anualidade, e antes do 1 de xullo, o beneficiario poderá solicitar o pagamento do saldo da axuda ante o órgano competente da súa comunidade autónoma ou ao Fondo Español de Garantía Agraria, se for o caso.

5. A comunidade autónoma ou o Fondo Español de Garantía Agraria, se for o caso, realizará os pagamentos nun prazo máximo de 75 días desde a recepción completa da solicitude de pagamento.

6. Para se consideraren admisibles, as solicitudes de pagamento irán acompañadas, ao menos:

a) Dun informe resumo das accións desagregadas en actividades co correspondente importe orzamentario e o custo final de cada unha delas e unha avaliación dos resultados obtidos que se poden verificar na data do informe.

b) Das facturas e demais comprobantes de gasto dos pagamentos realizados. No caso de accións cuxa execución se subcontrate a provedores de servizo, deberase entregar a factura do fornecedor e a proba do pagamento efectivo.

c) Dun cadro repertoriado das facturas.

d) Dun extracto bancario da conta mencionada no número 2 do presente artigo en que se poida comprobar a realización dos pagamentos xustificadas mediante as facturas citadas na alínea b).

e) O beneficiario quedará exento de presentar a documentación indicada na alínea b) cando se acolla á presentación do certificado dos seus estados financeiros, recollido no número 7 deste mesmo artigo.

7. No caso de programas cuxa subvención aprobada sexa igual ou superior a 300.000 euros, os beneficiarios poderán presentar un certificado dos seus estados financeiros, xunto á solicitude de pagamento, que deberá cubrir un importe correspondente a unha contribución da Unión dun importe igual ou superior a 150.000 euros. As comunidades autónomas, e o FEGA para o caso dos organismos públicos de ámbito nacional, poderán establecer limiares inferiores cando existan probas de que este método de control non aumenta o risco para os fondos da Unión.

Así mesmo, as comunidades autónomas e o FEGA poderán establecer a obrigatoriedade para o beneficiario de presentar este certificado xunto coa solicitude de pagamento.

O certificado será emitido por un auditor externo inscrito no Rexistro Oficial de Auditores de Contas do Instituto de Contabilidade e Auditoría de Contas que preste a garantía financeira a que se refire o artigo 27 da Lei 22/2015, do 20 de xullo, de auditoría de contas, e deberá ofrecer probas adecuadas da subvencionabilidade e autenticidade dos gastos propostos consoante os seguintes criterios:

a) Trátase de gastos realmente contraídos polo beneficiario ou pola entidade organizadora a que o beneficiario confiou a aplicación da programa de información ou promoción ou de partes del.

b) Corresponden aos gastos considerados subvencionables pola autoridade competente no orzamento do programa aprobado, e son necesarios para a execución do programa, nos termos aprobados pola autoridade competente.

c) Son identificables e verificables: están consignados, por exemplo, na contabilidade do beneficiario ou da entidade que execute as accións de promoción e determináronse consoante as normas de contabilidade aplicables ao beneficiario ou á entidade que execute as accións de promoción.

d) Axústanse ás exigencias da lexislación fiscal e social aplicable.

e) Son razoables e xustificados e cumpren o principio de boa xestión financeira, en especial no referente á economía e á eficiencia.

8. Así mesmo, para a xustificación técnica das accións, poderase solicitar ao beneficiario que presente os medios de proba que demostren a realización das accións promocionais.

9. Con carácter xeral, os tributos só se poderán considerar gastos subvencionables cando o beneficiario os aboe efectivamente. En ningún caso se considerarán gastos subvencionables os impostos indirectos cando sexan susceptibles de recuperación ou compensación. Fica, por tanto, excluído o financiamento do imposto sobre o valor engadido (IVE), ben como o imposto xeral indirecto canario (IXIC), na medida en que sexan deducibles.

Artigo 16. *Gastos subvencionables.*

1. Gastos administrativos do beneficiario, sempre que tales gastos se consignent nunha partida específica do orzamento recapitulativo do programa. Estes gastos incluírán, se for o caso, os correspondentes ao certificado dos seus estados financeiros.

2. Custos de persoal, se se producen con motivo da preparación, execución ou seguimento desa operación subvencionada concreta, incluída a avaliación. Estes custos de persoal inclúen os custos do persoal contratado polo beneficiario especificamente con motivo da operación e os custos correspondentes á proporción das horas de traballo investidas na operación polo persoal permanente do beneficiario.

As condicións para a subvencionabilidade destes e doutros gastos son as establecidas no anexo VII deste real decreto.

3. Non se poderán considerar subvencionables os custos referidos no anexo VIII deste real decreto.

Artigo 17. *Liberación de garantías.*

1. A garantía establecida no artigo 14 liberarase cando a comunidade autónoma teña recoñecido o dereito definitivo a percibir o importe anticipado.

2. A garantía establecida no artigo 11 deberá ter validez até o momento do pagamento do saldo e liberarase cando a autoridade competente da comunidade autónoma acorde a súa cancelación.

Artigo 18. *Controis.*

Os órganos competentes da comunidade autónoma e o Fondo Español de Garantía Agraria, se for o caso, realizarán todos os controis antes de aboar o pagamento final dun programa.

O máis tardar o 15 de xaneiro de cada ano, as comunidades autónomas comunicarán ao FEGA un informe anual sobre os controis efectuados durante o exercicio financeiro anterior para dar cumprimento aos requisitos establecidos no capítulo III do Regulamento de execución (UE) 2016/1150 da Comisión, do 15 de abril de 2016, polo que se establecen disposicións de aplicación do Regulamento (UE) n.º 1308/2013 do Parlamento Europeo e do Consello, no que se refire aos programas nacionais de apoio no sector vitivinícola, con respecto á medida de promoción de viño en terceiros países do programa de apoio. Este informe anual comunicarse utilizando o modelo que figura no anexo IX.

No caso de se efectuaren controis posteriores ao pagamento no ámbito de auditorías da IXAE ou doutros organismos nacionais ou internacionais, o resultado destes controis, en calquera caso, non afectará o grao de cumprimento do programa.

Artigo 19. *Controis administrativos.*

1. Efectuaranse controis administrativos de todas as solicitudes de axuda e de pagamento.

2. En caso de que o beneficiario presente o certificado dos seus estados financeiros, poderanse realizar controis administrativos do certificado. Non obstante, en caso de que a comprobación administrativa do certificado dos citados estados financeiros non ofrezca probas adecuadas da subvencionabilidade e realidade dos custos ou do cumprimento dos criterios enumerados no artigo 15.7, solicitarase a información adicional que se coide necesaria e efectuaranse outros controis, se for preciso.

Artigo 20. *Controis sobre o terreo.*

Os órganos competentes da comunidade autónoma e do Fondo Español de Garantía Agraria, se for o caso, realizarán un plan de control anual que incluíra unha mostra de, ao menos, o 5 por cento das solicitudes seleccionadas conforme o establecido no artigo 21, ben como o 5 por cento dos importes polos cales se solicite axuda.

Non obstante, os programas para os cales os beneficiarios comunicasen a intención de presentar un certificado dos seus estados financeiros, de conformidade co artigo 15.7, deberán ser sistematicamente obxecto de controis sobre o terreo ao menos unha vez antes do pagamento final.

Os controis sobre o terreo terán por obxecto a verificación da realidade e subvencionabilidade dos gastos e consistirán no cotexo das facturas e xustificantes presentados cos rexistros contables e, se for o caso, outros documentos xustificativos.

Na contabilidade xeral do beneficiario comprobarase que non se perciben axudas contidas no artigo 16.2 do Regulamento (UE) n.º 1305/2013 do Parlamento Europeo e do Consello, relativo á axuda ao desenvolvemento rural a través do Fondo Europeo Agrícola de Desenvolvemento Rural (Feader) e polo que se derroga o Regulamento (CE) n.º 1698/2005 do Consello, ou do Regulamento (UE) n.º 1144/2014 do Parlamento

Europeo e do Consello, sobre accións de información e de promoción relativas a produtos agrícolas no mercado interior e en terceiros países, e polo que se derroga o Regulamento (CE) n.º 3/2008 do Consello.

Poderanse realizar controis sobre o terreo dos programas de información e promoción nas dependencias do beneficiario ou da entidade que executa as accións de promoción a que o beneficiario confiase a aplicación do programa de información ou promoción ou de partes dela.

Os controis sobre o terreo poderanse anunciar cunha anticipación máxima de 14 días.

Durante estes controis sobre o terreo, os inspectores poderán comprobar unha mostra equivalente, como mínimo, ao 30 por cento do importe da axuda solicitada e, como mínimo, ao 5 por cento do total das facturas ou outros comprobantes presentados ou cubertos polo certificado dos seus estados financeiros, achegados até o momento en que se efectúa o control sobre o terreo.

Artigo 21. *Selección da mostra de control.*

1. A mostra do plan de control reflectido no artigo 20 será seleccionada cada ano pola autoridade competente sobre a base dunha análise de riscos e da representatividade das solicitudes de axuda presentadas.

A eficacia da análise de riscos avaliarase e actualizarase anualmente de acordo co disposto no artigo 34.1 do Regulamento de execución (UE) 2016/1150 da Comisión, do 15 de abril de 2016.

2. A representatividade das solicitudes antes referidas garantirase seleccionando de forma aleatoria entre un 20 por cento e un 25 por cento do número mínimo de beneficiarios que deban ser sometidos a controis sobre o terreo.

3. A autoridade competente levará rexistros dos motivos que conduciron á selección dun beneficiario determinado para os controis sobre o terreo. O inspector que realice o control sobre o terreo será informado deses motivos antes de iniciar o control.

Artigo 22. *Comprobación do material.*

Os beneficiarios da axuda deberanse asegurar da conformidade do material de información e promoción elaborado no marco dos programas, tanto coa normativa da Unión Europea como coa lexislación do terceiro país en que se desenvolva o programa. Para isto o beneficiario presentará ante a comunidade autónoma competente ou o Fondo Español de Garantía Agraria, se for o caso, unha declaración responsable onde indique a conformidade dese material e o cumprimento da normativa de aplicación correspondente, ben como evidencias da proba de chegada ao destino do material promocional utilizado polo destinatario no terceiro país, sempre que sexa susceptible de ser utilizado noutro mercado distinto ao país de destino.

Artigo 23. *Comité de avaliación e seguimento da medida.*

1. No marco da Mesa de Promoción Alimentaria aprobada na Conferencia Sectorial de Agricultura e Desenvolvemento Rural do 19 de febreiro de 2007 constituirase un comité de avaliación e seguimento da medida de promoción (en diante Comité) no cal se integrarán catro representantes do Ministerio de Agricultura e Pesca, Alimentación e Medio Ambiente, designados polo secretario xeral de Agricultura e Alimentación, un representante por cada unha das comunidades autónomas que desexen integrarse, un representante do ICEX España Exportación e Inversións, designado polo presidente do organismo, un representante da Federación Española do Viño, un de cooperativas agroalimentarias e un representante de cada unha das OPA representativas.

2. O Comité estará presidido polo director xeral da Industria Alimentaria e actuará como secretario un funcionario da Subdirección Xeral de Promoción Alimentaria, designado polo presidente, que actuará con voz pero sen voto. En caso de ausencia, vacante ou

enfermidade, o presidente será suplido polo vicepresidente, que será un funcionario con nivel de subdirector xeral, designado polo secretario xeral de Agricultura e Alimentación.

Será atendido por medios persoais, técnicos e orzamentarios do órgano en que se encontra integrado.

3. As funcións do Comité serán:

- a) Elaboración da estratexia e directrices previstas no artigo 7.
- b) Seguimento da execución e avaliación das accións e programas.
- c) Proposta de accións e programas de interese xeral.
- d) Propor prioridades respecto de produtos e países destinatarios.

4. O Comité reunirse periodicamente en función das necesidades ou a petición dos seus membros. Para tal fin, será informado, en relación con cada un dos programas, do calendario das accións previstas, dos informes das actividades realizadas e dos resultados dos controis practicados.

5. O Comité axustarase no seu funcionamento ao previsto na sección 3.^a do capítulo II do título preliminar da Lei 40/2015, do 1 de outubro, de réxime xurídico do sector público.

Artigo 24. *Informes.*

1. As comunidades autónomas elaborarán un informe anual do resultado dos programas e controis efectuados que se presentará antes do 1 de novembro de cada ano ao comité de avaliación e seguimento da medida previsto no artigo 23.

2. O Ministerio de Agricultura e Pesca, Alimentación e Medio Ambiente realizará anualmente un informe xeral dos programas acompañado, se for o caso, de propostas de modificación da medida.

Sección 2.^a Reestruturación e reconversión de viñas

Artigo 25. *Ámbito de aplicación.*

1. A axuda á reestruturación e reconversión de viñas establecida no artigo 46 do Regulamento (UE) n.º 1308/2013 do Parlamento Europeo e do Consello, do 17 de decembro de 2013, será de aplicación ás viñas que se destinen á produción de uva para vinificación.

Artigo 26. *Beneficiarios.*

1. Poderanse acoller á axuda á reestruturación e reconversión de viñas os viticultores cuxas viñas se destinen á produción de uva para vinificación.

2. Non poderán ser beneficiarios os que contraveñan a normativa vixente en materia de plantacións de viña, para calquera das superficies de viña da súa explotación.

Subsección 1.^a Reestruturación e reconversión de viñas mediante plans

Artigo 27. *Actividades subvencionables.*

1. O apoio para reestruturación e reconversión de viñas só se poderá conceder para unha ou varias das actividades seguintes:

- a) Reimplantación de viñas.
- b) Reconversión varietal.
- c) Mellora das técnicas de xestión de viñas.

2. Non se poderán acoller a este réxime de axudas:

a) A renovación normal das viñas que chegaron ao final do seu ciclo natural, entendida como a replantación dunha mesma parcela de terra coa mesma variedade de uva de vinificación e segundo o mesmo «método de cultivo».

b) As superficies que se beneficiaron desta axuda á reestruturación e reconversión de viñas nos últimos dez anos, salvo para o cambio de vaso a espaller ou a outro sistema de condución. O período contabilizarase a partir da data en que o beneficiario solicitou o pagamento definitivo da axuda para esa superficie ou a liquidación do saldo en caso de ter solicitado anticipo.

c) A arrinca e a plantación de viñas plantadas en virtude dunha concesión de novas plantacións outorgadas segundo o artigo 2.2 do Real decreto 1472/2000, do 4 de agosto, polo que se regula o potencial de produción vitícola, até pasados dez anos da plantación.

d) Os custos das accións recollidas no artigo 14 do Regulamento delegado (UE) 2016/1149 da Comisión, do 15 de abril de 2016.

e) As superficies plantadas cunha autorización de nova plantación concedida en virtude dos artigos 63 e 64 do Regulamento (UE) n.º 1308/2013 do Parlamento Europeo e do Consello, do 17 de decembro.

Artigo 28. *Plans de reestruturación e reconversión de viñas.*

1. O réxime de reestruturación e reconversión de viñas efectuarase por medio dos plans de reestruturación e reconversión, que conterán as correspondentes operacións que se van realizar. Os plans poderán ser anuais ou plurianuais, sen que en ningún caso se estendan alén do exercicio financeiro 2018.

2. Os plans de reestruturación e reconversión de viñas serán colectivos. Non obstante, as comunidades autónomas poderán admitir plans individuais cando as súas circunstancias específicas así o aconsellen. O número mínimo de viticultores que poderán constituír un plan colectivo de reestruturación e reconversión de viñas será de vinte. As comunidades autónomas poderán reducir o número mínimo de viticultores até cinco naquelas zonas en que, polas súas especiais características, non se poida atinxir o número citado para a realización dos plans colectivos.

3. Os plans colectivos de reestruturación e reconversión realizaranse no marco dun acordo celebrado entre os viticultores participantes.

Artigo 29. *Presentación dos plans de reestruturación e reconversión de viñas.*

1. Os viticultores que sexan persoas xurídicas e se queiran acoller a un plan de reestruturación e reconversión de viñas obxecto de financiamento da Unión Europea deberán presentar, de maneira electrónica, na forma disposta pola comunidade autónoma, a correspondente solicitude ante o órgano competente da comunidade autónoma en que estean as superficies que se van reestruturar ou reconverter, directamente ou través de calquera dos rexistros e medios previstos no artigo 16 da Lei 39/2015, do 1 de outubro, antes da data que determinará o citado órgano competente.

Así mesmo, e en aplicación do previsto no segundo parágrafo do número 5 do artigo 16 da Lei 39/2015, do 1 de outubro, os viticultores persoas físicas presentarán as súas solicitudes na mesma forma prevista no parágrafo anterior.

2. Os viticultores deberán presentar, xunto co proxecto do plan, a súa solicitude, que deberá conter, ao menos, a seguinte información:

- a) Obxectivos perseguidos por cada operación do plan.
- b) Localización do plan e identificación.
- c) Identificación dos viticultores que o integran, se o plan é colectivo.
- d) Superficie afectada por cada operación, ben como a localización e características das parcelas, iniciais e reestruturadas (variedades, sistemas de formación, marco de plantación, etc.), con fornecemento da identificación dos recintos Sixpac das parcelas que integran o plan.

e) Dereitos de replantación para converter en autorizacións de plantación, resolucións de arrinca e autorizacións de plantación concedidas en virtude dos artigos 66 e 68 do Regulamento (UE) n.º 1308/2013 do Parlamento Europeo e do Consello, do 17 de decembro, que se vaian incluír no proxecto.

f) Estudo de custos e descrición detallada das accións propostas e calendario previsto de execución e financiamento de cada operación en cada exercicio orzamentario.

Naqueles casos en que o viticultor non sexa propietario da parcela que se quere reestruturar ou reconverter necesitarase autorización do propietario.

Artigo 30. *Requisitos dos plans.*

1. A superficie total reestruturada ou reconvertida no marco dun plan de reestruturación e reconversión de viñas deberá ser de, ao menos, 10 hectáreas para os plans colectivos e 0,5 hectáreas para os plans individuais.

Non obstante o disposto no parágrafo anterior, as comunidades autónomas poderán establecer límites superiores ou inferiores sempre que neste último suposto o tamaño medio das parcelas de viña desa comunidade sexa inferior a 0,2 hectáreas.

2. A parcela de viña, unha vez reestruturada ou reconvertida, terá que ser, ao menos, de 0,5 hectáreas. Non obstante, este límite poderá ser inferior se o número de parcelas, despois da realización do plan de reestruturación e reconversión, é inferior ao 80 por cento do número de parcelas iniciais, ou se o tamaño medio das parcelas de viña para unha comunidade autónoma é inferior a 0,1 hectáreas. Tamén poderá ser inferior a 0,5 hectáreas se é estremeira con outra parcela do mesmo titular ou viticultor.

Nos casos en que a operación se limite a accións de sobre enxertía ou de cambio de vaso a espaller ou a outro sistema de condución, a superficie mínima será a inicial.

3. A superficie máxima obxecto de resolución aprobatoria será de 25 hectáreas por viticultor e ano. Non obstante, as comunidades autónomas poderán reducir a superficie máxima que se vai reestruturar ou reconverter por viticultor e ano.

4. Será obrigatoria en todas as plantacións, salvo nas situadas na Comunidade Autónoma de Canarias, a utilización de portaenxertos certificados. Para percibir a axuda é necesaria a presentación da factura do viveirista ou comerciante autorizado e o comprobante de pagamento.

Artigo 31. *Aprobación dos plans.*

1. De acordo co artigo 23.1 do Regulamento de execución (UE) 2016/1150 da Comisión, do 15 de abril de 2016, as comunidades autónomas examinarán as solicitudes dos plans presentadas e avaliarán a admisibilidade destas en relación co cumprimento do prazo de presentación, a adecuación do seu contido, as condicións dos plans e os custos subvencionables. Así mesmo, requirirán ao solicitante, se for o caso, a presentación da documentación ou información que se debe emendar, ou da adicional pertinente.

2. As comunidades autónomas resolverán sobre as solicitudes dos plans presentados, sen que a aprobación da solicitude supoña ningún compromiso futuro de gasto por parte das administracións, no prazo máximo de seis meses desde a finalización do prazo de presentación de solicitudes. Transcorrido o prazo de seis meses sen se ter notificado aos interesados resolución ningunha, estes poderán entender desestimada a súa solicitude. Ás solicitudes que non cumpran os requisitos de admisibilidade do número 1 aplicaráselles o número 6 do artigo 23 do Regulamento de execución (UE) 2016/1150 da Comisión, do 15 de abril de 2016.

Contra a resolución da comunidade autónoma poderase interpor o correspondente recurso en vía administrativa ou contencioso-administrativa, en función de que non esgote ou si esgote a vía administrativa.

3. Na aprobación dos plans de reestruturación e reconversión de viñas, os plans colectivos serán prioritarios sobre os individuais. Tamén serán prioritarias as explotacións de titularidade compartida de acordo coa Lei 35/2011, do 4 de outubro. As comunidades

autónomas deberán ponderar estes criterios de prioridade e comunicalo ao Ministerio de Agricultura e Pesca, Alimentación e Medio Ambiente, antes do 1 de febreiro do exercicio anterior, para a súa inclusión no programa de apoio no marco das modificacións que se deben facer segundo o artigo 2 e de acordo co artigo 3 do Regulamento de execución (UE) 2016/1150 da Comisión, do 15 de abril de 2016.

Artigo 32. Asignación inicial de fondos.

1. As comunidades autónomas remitirán ao Ministerio de Agricultura e Pesca, Alimentación e Medio Ambiente, antes do 15 de setembro de cada ano, as necesidades de financiamento para o exercicio financeiro seguinte de acordo co anexo X.

2. Unha vez coñecidas as dispoñibilidades financeiras para a reestruturación e reconversión de viñas de cada exercicio, a Conferencia Sectorial de Agricultura e Desenvolvemento Rural, tendo en conta a información remitida polas comunidades autónomas prevista no número anterior, acordará a asignación inicial de fondos para cada comunidade autónoma. Esta asignación realizarase tendo en conta, en todo caso, a superficie de viña e a necesidade de reestruturar determinadas viñas como consecuencia da falta de adecuación das súas producións ao mercado, sen prexuízo da reasignación posterior de fondos que se realizará, se for o caso, segundo o disposto no artigo 35.

Artigo 33. Criterios de prioridade adicionais.

As comunidades autónomas poderán fixar criterios de prioridade adicionais e, nese caso, deberán comunicalo, xunto á súa ponderación, ao Ministerio de Agricultura e Pesca, Alimentación e Medio Ambiente antes do 1 de febreiro do exercicio anterior, para a súa inclusión no programa de apoio no marco das modificacións que se deben facer segundo o artigo 2 e de acordo co artigo 3 do Regulamento de execución (UE) 2016/1150 da Comisión, do 15 de abril de 2016. Non se poderán aplicar outros criterios e ponderacións non incluídos no programa de apoio e comunicados á Comisión Europea.

Os criterios de prioridade adicionais que cada comunidade autónoma aplique deberán basear na estratexia e nos obxectivos específicos presentados por cada comunidade autónoma no programa de apoio e deberán ser obxectivos e non discriminatorios.

Artigo 34. Procedemento de selección de solicitudes e de selección de operacións para un exercicio financeiro.

1. De acordo co artigo 23.2 do Regulamento de execución (UE) 2016/1150 da Comisión, do 15 de abril de 2016, as comunidades autónomas deberán clasificar as solicitudes admisibles para un exercicio financeiro conforme a puntuación obtida ao aplicar a ponderación aos criterios de prioridade establecidos polas comunidades autónomas segundo o artigo 33.

2. Cando as comunidades autónomas coñezan a asignación inicial para un exercicio financeiro determinado segundo o artigo 32.2, deberán seleccionar as novas solicitudes e operacións nese exercicio financeiro en función dos fondos dispoñibles para novas solicitudes que determinen dentro da súa asignación inicial e de acordo co establecido no artigo 23 do Regulamento de execución (UE) 2016/1150 da Comisión, do 15 de abril de 2016, e poden reservar fondos desa asignación para realizar pagamentos no exercicio de operacións que non correspondan a novas solicitudes.

3. Conforme a selección do número 2, as comunidades autónomas realizarán a aprobación definitiva das operacións que serán financiadas no exercicio financeiro.

4. Cando existan solicitudes excluídas resultantes do establecido no número anterior segundo o número 6 do artigo 23 do Regulamento de execución (UE) 2016/1150 da Comisión, do 15 de abril de 2016, os solicitantes deberán ser informados dos motivos da exclusión. Non obstante, as comunidades autónomas poderán aplicar o disposto no

artigo 5 do artigo 23 do Regulamento de execución (UE) 2016/1150 da Comisión, do 15 de abril de 2016.

Contra a resolución motivada da comunidade autónoma poderase interpor o correspondente recurso en vía administrativa ou contencioso-administrativa, en función de que non esgote ou si esgote a vía administrativa.

Artigo 35. *Reasignación de fondos entre comunidades autónomas.*

1. O máis tardar o 20 de xuño de cada ano, as comunidades autónomas enviarán á Dirección Xeral de Producións e Mercados Agrarios do Ministerio de Agricultura e Pesca, Alimentación e Medio Ambiente a declaración dos pagamentos realizados polo organismo pagador no exercicio financeiro en curso, referidos ao venres da semana inmediatamente anterior á data do 20 de xuño, de acordo co anexo XI.

2. Cando os pagamentos comunicados, de acordo co número anterior, por unha comunidade autónoma excedan o 90 por cento da súa asignación inicial financeira acordada segundo o artigo 32 para o exercicio en cuestión, e se a comunidade autónoma tiver necesidades de fondos até o 15 de outubro do exercicio financeiro en curso, por cima das cantidades pagadas até a data prevista no número 1, tales necesidades poderanse atender en caso de existiren fondos non utilizados por outras comunidades autónomas. As necesidades deberanse comunicar de acordo co previsto no anexo XI.

3. Cando os pagamentos comunicados por unha comunidade autónoma de acordo co número 1 sexan inferiores ao 90 por cento da súa asignación inicial, procederase a unha reasignación dos fondos iniciais concedidos a esa comunidade autónoma segundo o artigo 32, axustándoos ao pagamento realizado e comunicado segundo o número 1.

4. Os fondos non utilizados distribuiranse entre as comunidades autónomas con necesidades que cumpran co número 2, segundo os criterios acordados segundo o artigo 32.

Artigo 36. *Prazo de finalización e pagamento das operacións.*

A comunicación da solicitude de pagamento referida no artigo 39 deberá ser realizada polo beneficiario até o 31 de xullo de 2018. O pagamento aos beneficiarios realizarase o antes posible e, o máis tardar, nun prazo máximo de doce meses desde a data da presentación da solicitude de pagamento válida e completa, sen que en ningún caso o pagamento da operación se estenda alén do exercicio financeiro 2018.

Artigo 37. *Cálculo da axuda.*

1. Poderanse conceder axudas para:

a) Compensar os viticultores participantes no plan pola perda de ingresos derivada da súa aplicación.

b) Participar nos custos da reestruturación e reconversión de viñas.

2. A compensación aos viticultores por perdas de ingresos concederase durante un máximo de dúas campañas. A compensación será do 25 por cento do valor medio da uva das tres últimas campañas no ámbito territorial onde se encontren as parcelas obxecto de reestruturación ou reconversión, que a comunidade autónoma deberá definir.

Non obstante o disposto no parágrafo anterior, non terán dereito de compensación por perda de ingresos aquelas superficies reestruturadas coa achega dunha autorización de plantación concedidas en virtude dos artigos 66 e 68 do Regulamento (UE) n.º 1308/2013 do Parlamento Europeo e do Consello, do 17 de decembro, e xerada por unha arrinca non efectuada na aplicación do plan de reestruturación.

Cando a operación que se leve a cabo sobre unha parcela de viña sexa a sobreexertía ou a transformación de vaso en espaller ou noutro sistema de condución, concederase a compensación por perda de ingresos para esa superficie por unha campaña.

3. A participación nos custos da reestruturación e reconversión da viña unicamente se poderá efectuar para as accións recollidas no anexo XII, sen que se poidan financiar

accións de forma illada, a excepción da sobreexertía ou do cambio de vaso a espallar ou a outro sistema de conducción. Tampouco serán subvencionables as accións con material de segunda man.

A participación nos custos da reestruturación e reconversión da viña será o resultado de aplicar a porcentaxe fixada no artigo 46.6 do Regulamento (UE) n.º 1308/2013 do Parlamento Europeo e do Consello, do 17 de decembro de 2013, para os plans colectivos, e un 15 por cento inferior para os plans individuais, aos importes máximos establecidos para cada unha das accións recollidas no anexo XII. O montante percibido en ningún caso poderá ser superior ao que resulte da aplicación de tales porcentaxes sobre o gasto efectivamente realizado e demostrado mediante factura e comprobante de pagamento para todas aquelas accións que non fosen executadas polo propio beneficiario. As comunidades autónomas poderán dispor, para o seu ámbito territorial, a aplicación dunha porcentaxe inferior á fixada no artigo 46.6 do Regulamento (UE) n.º 1308/2013 do Parlamento Europeo e do Consello, do 17 de decembro de 2013, e non aplicar a subvención dalgunha das accións determinadas no anexo XII.

Segundo o establecido no artigo 45 do Regulamento delegado (UE) 2016/1149 da Comisión, do 15 de abril de 2016, as contribucións en especie en forma de provisión de traballo que non foron obxecto de ningún pagamento en efectivo xustificado con facturas e xustificantes de pagamento poderán optar á axuda sempre que a comunidade autónoma o prevea e o comunique ao Ministerio de Agricultura e Pesca, Alimentación e Medio Ambiente para a súa comunicación á Comisión no programa de apoio.

Para efectos do cálculo do importe da axuda correspondente ás contribucións en especie, teranse en conta os números 2.b) e 3 do artigo 45 do Regulamento delegado (UE) 2016/1149 da Comisión, do 15 de abril de 2016.

A fin de cumprir o establecido no artigo 3.a).vi) do Regulamento de execución (UE) 2016/1150 da Comisión, do 15 de abril de 2016, o método de cálculo que se aplicará por cada comunidade autónoma para determinar o valor do traballo propio e a súa adaptación anual deberase comunicar á Dirección Xeral de Producións e Mercados Agrarios do Ministerio de Agricultura e Pesca, Alimentación e Medio Ambiente antes do 1 de febreiro do exercicio anterior.

Non se financiarán os custos de arrinca naquelas superficies onde se utilicen autorizacións de plantación concedidas en virtude dos artigos 66 e 68 do Regulamento (UE) n.º 1308/2013 do Parlamento Europeo e do Consello, do 17 de decembro, non xeradas pola arrinca efectuada na aplicación do plan de reestruturación e con anterioridade á solicitude do plan.

4. Para determinar o importe da axuda a que ten dereito un viticultor pola reestruturación e reconversión dunha superficie de viña, as comunidades autónomas realizarán unha medición da parcela reestruturada e, se for o caso, da parcela arrincada seguindo o método establecido no artigo 44 do Regulamento de execución (UE) 2016/1150 da Comisión, do 15 de abril de 2016.

5. Poderase autorizar a subrogación dos dereitos e obrigacións derivados da aprobación do plan a un novo viticultor, se este asume os compromisos adquiridos polo viticultor a quen se lle aprobou o plan nas parcelas subrogadas.

6. Salvo causas de forza maior ou circunstancias excepcionais segundo se recolle no segundo punto do artigo 2 do Regulamento (UE) n.º 1306/2013 do Parlamento Europeo e do Consello, do 17 de decembro de 2013, e nos casos de expropiación, as superficies acollidas aos plans de reestruturación e reconversión de viñas de acordo co presente real decreto deberán permanecer en cultivo un período mínimo de dez campañas contando desde a campaña seguinte a aquela en que se solicitou o pagamento. O seu incumprimento obrigará o beneficiario da axuda á devolución da axuda percibida máis os xuros legais correspondentes.

Artigo 38. Anticipos.

1. Non obstante o disposto no artigo 39, os participantes nos plans poderán solicitar un anticipo máximo do 80 por cento da axuda inicialmente aprobada cando constituísen unha garantía por un importe ao menos igual ao importe do anticipo.

2. Sen prexuízo do previsto no artigo 36, cando se concedan anticipos, a garantía executarase cando non se cumprise a obrigaón establecida de gastar o importe total do anticipo concedido na execución da operación de que se trate antes de que finalice o segundo exercicio financeiro seguinte a aquel en que se pagou o anticipo, salvo caso de forza maior ou outras circunstancias excepcionais.

Cando as superficies consideradas se encontren nunha zona que sufriu unha catástrofe natural recoñecida polas autoridades competentes ou as operacións previstas non se poidan levar a cabo debido a problemas fitosanitarios certificados por un organismo acreditado, poderase adaptar o prazo para o gasto do importe anticipado.

Cando o organismo pagador competente considere que o importe dos gastos reais correspondentes á contribución da Unión Europea destinada ás operacións de que se trate supera o importe do anticipo, a garantía poderá ser liberada.

Artigo 39. Pagamento da axuda aos beneficiarios.

1. Despois da finalización de cada operación, o beneficiario deberá presentar unha solicitude ou comunicación para o pagamento da axuda, ante o órgano competente da súa comunidade autónoma.

2. A dita solicitude ou comunicación deberá ir acompañada, ao menos, das facturas e comprobantes dos pagamentos que realice o beneficiario.

3. A axuda pagarase segundo o cálculo establecido no artigo 37 do presente real decreto e unha vez que se comprobe que a operación se executou totalmente e se axusta á solicitude aprobada ou modificada de acordo co artigo 47.

4. Se o viticultor non executa a operación na superficie total para a cal se aprobou a axuda, terase en conta a diferenza entre a superficie aprobada ou modificada segundo o artigo 47 e a superficie realmente executada determinada polos controis sobre o terreo. Se esta diferenza non supera o 20 por cento, calcularase sobre a base da superficie determinada polos controis sobre o terreo. Se a diferenza é superior ao 20 por cento, pero igual ou inferior ao 50 por cento, calcularase sobre a base da superficie determinada polos controis sobre o terreo e reducida no dobre da diferenza comprobada. No entanto, non terá dereito á axuda en caso de que esta diferenza de superficies supere o 50 por cento.

5. No caso de que o viticultor percibise un anticipo superior á axuda definitiva, deberá reembolsar a diferenza. Se, pola contra, a axuda definitiva resulta superior ao anticipo percibido, terá dereito ao cobramento da diferenza, sen que en ningún caso a axuda total sexa superior á inicialmente solicitada.

6. No caso de que un viticultor non execute as accións para as cales se aprobou a axuda, isto será considerado infracción leve segundo o previsto no artigo 38.1.g) da Lei 24/2003, do 10 de xullo, e será sancionado de conformidade co establecido no artigo 42.1 da citada lei, e recuperarase, se for o caso, o anticipo aboado, salvo causas de forza maior ou circunstancias excepcionais. Así mesmo, non se pagará polas accións non realizadas.

7. A comunidade autónoma deberá emitir unha resolución de pagamento e realizar o pagamento ao beneficiario o antes posible e o máis tardar nun prazo máximo de doce meses desde a data da presentación da solicitude de pagamento válida e completa.

8. Non se poderán financiar con cargo ao programa de apoio 2014-2018 medidas de plans presentados no marco do Regulamento (CE) n.º 1493/1999 do Consello, do 17 de maio, polo que se establece a organización común do mercado vitivinícola.

Subsección 2.^a Replantación de viñas após a arrinca obrigatoria por motivos sanitarios ou fitosanitarios por orde da autoridade competente

Artigo 40. *Ámbito de aplicación.*

Poderase conceder apoio á replantación aos viticultores que fosen obrigados a arrincar unha superficie de viña por motivos sanitarios ou fitosanitarios por telo así establecido a autoridade competente da comunidade autónoma a partir da publicación do presente real decreto, sempre que na dita arrinca obrigatoria se cumprise o disposto na Directiva 2000/29/CE do Consello e na Lei 43/2002, do 20 de novembro, de sanidade vexetal.

Artigo 41. *Requisitos da medida.*

1. Esta medida deberase executar antes do 1 de xuño da campaña seguinte á que se solicitou.
2. Será obrigatoria en todas as replantacións, salvo as situadas na Comunidade Autónoma de Canarias, a utilización de portaenxertos certificados. Para percibir a axuda é necesaria a presentación da factura do viveirista ou comerciante autorizado e o xustificante de pagamento.

Artigo 42. *Presentación e requisitos das solicitudes.*

1. Os interesados que sexan persoas xurídicas e queiran acollerse a esta axuda deberán presentar a solicitude ante o órgano competente da comunidade autónoma en que estea situada a superficie arrincada de forma obrigatoria por motivos sanitarios ou fitosanitarios, de maneira electrónica, na forma disposta pola comunidade autónoma, directamente ou a través dos rexistros e medios previstos no artigo 16 da Lei 39/2015, do 1 de outubro, con anterioridade ao 1 de febreiro da campaña anterior á que se pretenda executar a replantación.

Así mesmo, e en aplicación do previsto no segundo parágrafo do artigo 16.5 da Lei 39/2015, do 1 de outubro, os interesados persoas físicas presentarán as súas solicitudes na mesma forma prevista no parágrafo anterior.

A solicitude deberá conter ao menos a seguinte información:

- a) Descrición detallada das accións que se van realizar e prazo de execución.
- b) Superficie que se vai replantar, indicando a localización e características das parcelas, iniciais e finais (variedades, sistemas de formación, marco de plantación, etc.), con fornecemento da identificación dos recintos Sixpac das parcelas.
- c) Documentación xustificativa de ter arrincado a dita superficie por obrigación da autoridade competente debido a motivos sanitarios ou fitosanitarios.
- d) Autorizacións de plantación concedidas en virtude dos artigos 66 e 68 do Regulamento (UE) n.º 1308/2013 do Parlamento Europeo e do Consello, do 17 de decembro, que se van utilizar.
- e) Estudo de custos.

2. A superficie máxima pola cal se solicita a axuda non superará a superficie que se arrincou de forma obrigatoria por motivos sanitarios ou fitosanitarios.

Artigo 43. *Tramitación de solicitudes e asignación de fondos.*

1. De acordo co número 1 do artigo 23 do Regulamento de execución (UE) 2016/1150 da Comisión, do 15 de abril de 2016, as comunidades autónomas examinarán as solicitudes presentadas e avaliarán a admisibilidade destas en relación co cumprimento do prazo de presentación, a adecuación do seu contido e os custos subvencionables. Así mesmo, requirirán ao solicitante, se for o caso, a presentación da documentación ou información que se debe emendar, ou da adicional pertinente.

2. As comunidades autónomas remitirán ao Ministerio de Agricultura e Pesca, Alimentación e Medio Ambiente antes do 1 de maio as necesidades de financiamento para

a replantación por motivos sanitarios ou fitosanitarios para o seguinte exercicio de acordo co anexo XIII.

3. A Conferencia Sectorial de Agricultura e Desenvolvemento Rural acordará a asignación financeira para o seguinte exercicio en función das necesidades comunicadas no parágrafo anterior. Nesa asignación terase en conta que o gasto total para replantación por motivos sanitarios ou fitosanitarios para un exercicio non poderá exceder o 15 por cento do gasto total para a medida de reestruturación e reconversión de viñas no mesmo exercicio. En caso de que as dispoñibilidades orzamentarias non alcancen para cubrir a totalidade das solicitudes, darase prioridade ás que proveñan de explotacións de titularidade compartida de acordo coa Lei 35/2011, do 4 de outubro.

Unha vez acordada a asignación financeira, as comunidades autónomas resolverán as solicitudes e notificaranas aos beneficiarios. O prazo máximo para a resolución e notificación será de seis meses desde a finalización do prazo de presentación de solicitudes. Ás solicitudes que non cumpran os requisitos de admisibilidade do número 1 aplicaráselles o previsto no artigo 23.6 do Regulamento de execución (UE) 2016/1150 da Comisión, do 15 de abril de 2016.

Contra a resolución da comunidade autónoma poderase interpor o correspondente recurso en vía administrativa ou contencioso-administrativa, en función de que non esgote ou si esgote a vía administrativa.

Artigo 44. *Cálculo da axuda.*

1. Poderase conceder axuda para participar nos custos da replantación polas accións de preparación do solo, planta e plantación, sistema de conducción, desinfección e tubos de plástico que rodean a planta para protección contra coellos no momento da plantación, sen que se poidan financiar accións de forma illada, a excepción da operación de planta e plantación.

En ningún caso será financiada nin a acción de arrinca nin se poderá conceder unha compensación por perda de ingresos.

2. A participación nos custos da replantación será o resultado de aplicar a porcentaxe fixada no artigo 46.6 do Regulamento (UE) n.º 1308/2013 do Parlamento Europeo e do Consello, do 17 de decembro de 2013, aos importes máximos recollidos no anexo XII establecidos para as accións subvencionables. O montante percibido en ningún caso poderá ser superior ao que resulte da aplicación das ditas porcentaxes sobre o gasto efectivamente realizado e acreditado mediante factura e xustificante de pagamento para todas aquelas accións que non fosen executadas por medios propios.

3. Segundo o establecido no artigo 45 do Regulamento delegado (UE) 2016/1149 da Comisión, do 15 de abril de 2016, as contribucións en especie en forma de provisión de traballo que non fosen obxecto de ningún pagamento en efectivo xustificadas con facturas xustificativas do pagamento poderán optar á axuda sempre que a comunidade autónoma o prevexa e o comunique ao Ministerio de Agricultura e Pesca, Alimentación e Medio Ambiente para a súa comunicación á Comisión no programa de apoio.

Para efectos do cálculo do importe da axuda correspondente ás contribucións en especie teranse en conta os números 2.b) e 3 do artigo 45 do Regulamento delegado (UE) 2016/1149 da Comisión, do 15 de abril de 2016.

A fin de cumprir co establecido no artigo 3 a) vi) do Regulamento de execución (UE) 2016/1150 da Comisión, do 15 de abril de 2016, o método de cálculo que aplicará cada comunidade autónoma para determinar o valor do traballo propio e a súa adaptación anual deberase comunicar á Dirección Xeral de Producións e Mercados Agrarios do Ministerio de Agricultura e Pesca, Alimentación e Medio Ambiente antes do 1 de febreiro do exercicio anterior.

4. Para determinar o importe da axuda a que ten dereito un beneficiario pola replantación por motivos sanitarios ou fitosanitarios, as comunidades autónomas realizarán unha medición da parcela reestruturada e, se for o caso, seguindo o método establecido no 44 do Regulamento de execución (UE) 2016/1150 da Comisión, do 15 de abril de 2016.

Artigo 45. *Solicitud de pagamento e pagamento aos beneficiarios.*

1. Despois da finalización da operación, o beneficiario deberá presentar unha solicitude ou comunicación para o pagamento da axuda ante o órgano competente da comunidade autónoma, con anterioridade ao 1 de xuño da campaña en que se executou a replantación.

2. A dita solicitude ou comunicación deberá ir acompañada, ao menos, das facturas e xustificantes dos pagamentos que realice o beneficiario.

3. A axuda pagarase segundo o cálculo establecido no artigo 44 do presente real decreto, unha vez que se comprobouse que se executou a operación e que se axusta á solicitude aprobada.

4. Se o viticultor non executa a operación na superficie total para a cal se aprobou a axuda, terase en conta a diferenza entre a superficie aprobada ou modificada segundo o artigo 47 e a superficie realmente executada determinada polos controis sobre o terreo. Se esta diferenza non supera o 20 por cento, calcularase sobre a base da superficie determinada polos controis sobre o terreo. Se a diferenza é superior ao 20 por cento, pero igual ou inferior ao 50 por cento, calcularase sobre a base da superficie determinada polos controis sobre o terreo e reducida no dobre da diferenza comprobada e non terá dereito a ela en caso de que esta diferenza supere o 50 por cento.

5. Salvo causas de forza maior ou circunstancias excepcionais segundo se recolle no segundo punto do artigo 2 do Regulamento (UE) n.º 1306/2013 do Parlamento Europeo e do Consello, do 17 de decembro de 2013, nos casos de expropiación, as superficies acollidas a replantación por motivos sanitarios ou fitosanitarios de acordo co presente real decreto deberán permanecer en cultivo un período mínimo de dez campañas contando desde a campaña seguinte a aquela en que se solicitou o pagamento. O seu incumprimento obrigará o beneficiario da axuda á devolución da axuda percibida máis os xuros legais correspondentes.

6. A comunidade autónoma deberá emitir unha resolución de pagamento e realizar o pagamento ao beneficiario o antes posible, e o máis tardar nun prazo máximo de doce meses desde a data da presentación da solicitude de pagamento válida e completa. En ningún caso o pagamento da axuda se estenderá alén do exercicio financeiro 2018.

Subsección 3.^a Disposicións comúns á reestruturación e reconversión de viñas

Artigo 46. *Condiciónalidade.*

Se se constata que un beneficiario, en calquera momento durante un período de tres anos a partir do 1 de xaneiro do ano seguinte ao ano natural en que se producise o primeiro pagamento en virtude da presente sección, non respectou na súa explotación os requisitos legais de xestión e as boas condicións agrarias e ambientais a que se refiren os artigos 91, 92, 93, 94 e 95 do Regulamento (UE) n.º 1306/2013 do Parlamento Europeo e do Consello, do 17 de decembro de 2013, o importe da axuda, en caso de que o incumprimento se deba a unha acción ou omisión atribuíble directamente ao beneficiario, reducirase ou cancelarse, parcial ou totalmente, dependendo da gravidade, alcance, persistencia e repetición do incumprimento, e o beneficiario deberá reintegrala, se procede, conforme o establecido nas citadas disposicións. Para efectos deste control de condicionalidade, as comunidades autónomas deberán dispor de información actualizada sobre as referencias alfanuméricas Sixpac de todas as parcelas que forman parte da explotación do beneficiario.

Artigo 47. *Modificacións das operacións aos beneficiarios.*

Segundo o establecido no número 1 do artigo 53 do Regulamento delegado (UE) 2016/1149 da Comisión, do 15 de abril de 2016, os beneficiarios poderán solicitar modificacións das operacións inicialmente aprobadas sempre que non se realizen os controis sobre o terreo previos ao pagamento final. Todas as modificacións deberán estar

autorizadas antes da súa execución pola comunidade autónoma que aprobou inicialmente a operación.

A solicitude de modificación deberá estar debidamente xustificada, non comprometer o obxectivo global da operación, non modificar á alza o orzamento aprobado nin supor cambios na admisibilidade ou na ponderación recibida no procedemento de selección, e presentarse ante o órgano competente de comunidade autónoma, antes de presentar a solicitude de pagamento de axuda, no prazo e forma que esta comunidade determine.

Artigo 48. *Comunicacións.*

1. As comunidades autónomas remitirán ao Ministerio de Agricultura e Pesca, Alimentación e Medio Ambiente antes do 15 de novembro de cada ano, e referido ao exercicio financeiro precedente, un informe anual sobre a aplicación do réxime de reestruturación e reconversión de viñas, incluído, se for o caso, un informe da replantación após arrinca obrigatorio por motivos sanitarios ou fitosanitarios.

2. As comunidades autónomas comunicarán, en caso de aplicar a medida de replantación por motivos sanitarios ou fitosanitarios, ao Ministerio de Agricultura e Pesca, Alimentación e Medio Ambiente antes do 1 de maio de cada ano a lista de organismos nocivos que estean cubertos por esa medida, ben como un resumo do plan estratéxico que teñan establecido para actuar contra eles.

3. As comunidades autónomas facilitarán anualmente ao Ministerio de Agricultura e Pesca, Alimentación e Medio Ambiente información sobre os custos das operacións executadas polas cales se pagou a axuda, sobre a base dunha mostra de comprobantes de pagamento, a fin de revisar e, se for o caso, actualizar os importes fixados no anexo XII.

Sección 3.^a Eliminación de subproductos

Subsección 1.^a Obrigación da eliminación de subproductos

Artigo 49. *Ámbito de aplicación.*

1. Os produtores estarán obrigados á eliminación dos subproductos obtidos na transformación. Non obstante, os produtores que, na campaña vitícola de que se trate, non produzan máis de 25 hectolitros de viño ou mosto nas súas instalacións non estarán obrigados a retirar os subproductos.

2. Poderase cumprir parcial ou totalmente coa obrigación de eliminar os subproductos de vinificación ou de calquera outra transformación de uvas mediante a entrega dos subproductos para a destilación, ou realizando unha retirada baixo control tal e como se establece no artigo 52. Sen prexuízo do previsto no número 1, a comunidade autónoma poderá establecer a obrigación de eliminar a totalidade dos subproductos producidos na súa rexión mediante a destilación.

En caso de que o cumprimento sexa mediante a entrega dos subproductos para a destilación, os produtores porán ao dispor da autoridade competente para o control desta obrigación os comprobantes que permitan demostrar o cumprimento, cando así lles sexa requirido.

Artigo 50. *Requisitos dos subproductos eliminados.*

1. O volume mínimo de alcohol contido nos subproductos eliminados deberá ser:

a) O 10 por cento do volume de alcohol contido no viño producido obtido por vinificación directa da uva. As comunidades autónomas poderán reducir a porcentaxe do volume de alcohol contido nos subproductos ao 7 por cento para os viños brancos con denominación de orixe protexida do seu ámbito territorial, sempre que se xustifique polo sistema de elaboración a imposibilidade de chegar ao 10 por cento e o seu rendemento en viño non supere os límites establecidos polo consello regulador correspondente.

b) O 5 por cento do volume de alcohol contido no produto elaborado, para os elaboradores de viño a partir de mosto ou de viño novo en proceso de transformación.

2. Para determinar o volume de alcohol que deben ter os subprodutos en relación co do viño producido, aplicaranse os seguintes graos alcohólicos volumétricos naturais do viño nas diferentes zonas vitícolas, tal e como se establecen no artigo 21.3 do Regulamento (CE) n.º 555/2008 da Comisión, do 27 de xuño:

- a) 9,0 por cento para a zona CI.
- b) 9,5 por cento para a zona CII.
- c) 10 por cento para a zona CIII.

3. O contido mínimo de alcohol puro dos subprodutos da vinificación que vaian eliminar deberá ser o seguinte:

- a) Bagazo de uva: 2,8 litros de alcohol puro por cada 100 quilogramos.
- b) Borrás de viño: 4 litros de alcohol puro por cada 100 quilogramos.

4. Se non se atinxiren as porcentaxes fixadas no número 1, poderán entregar viño a un destilador ou a un fabricante de vinagre, segundo o número 2 do artigo 23 do Regulamento (CE) n.º 555/2008 da Comisión, do 27 de xuño. No caso de produtores que entreguen viño a unha fábrica de vinagre, a cantidade de alcohol contida nos viños entregados deducirase da cantidade de alcohol que se deba entregar para cumprir a obrigaón establecida.

Artigo 51. *Prazo de entrega á destilación.*

A data límite de entrega dos subprodutos obtidos nunha determinada campaña a un destilador será o 15 de xuño desa campaña.

Artigo 52. *Retiradas baixo control.*

1. Poderase utilizar un procedemento de retirada controlada para a eliminación de subprodutos cando se comunicase á autoridade competente que se vai optar por este sistema de eliminación, mediante a presentación dun proxecto detallado.

O citado proxecto deberá conter a referencia ao tipo de produto e unha descrición detallada do procedemento proposto para a retirada. Así mesmo, deberase achegar, cando a comunidade autónoma o considere necesario, a conformidade da autoridade ambiental sobre a procedencia da retirada.

A operación de retirada controlada debe ser autorizada pola autoridade competente, que establecerá as condicións en que se realizará e que se deberá notificar ao produtor.

Contra a resolución da comunidade autónoma poderase interpor o correspondente recurso en vía administrativa ou contencioso-administrativa, en función de que non esgote ou si esgote a vía administrativa.

2. A retirada das borras, en caso de non se enviaren á destilación, poderase considerar efectuada cando estas se desnaturalizasen de forma que imposibilite a súa utilización no proceso de vinificación e a súa entrega a terceiros fose consignada nos rexistros correspondentes.

3. O contido mínimo de alcohol puro dos subprodutos para retirar será o indicado no artigo 50.3.

4. Esta autorización non exime das obrigaóns fiscais previstas na normativa dos impostos especiais cando os produtos para os cales se autoriza a retirada controlada están suxeitos a esas obrigaóns.

Artigo 53. *Sancións.*

O incumprimento da entrega dos subprodutos á destilación ou da realización, na súa falta, da retirada baixo control, ou, en caso de non se atinxiren as porcentaxes mínimas de

alcohol contido nos subprodutos fixados no artigo 50.1, será considerado unha infracción leve segundo o disposto nas letras j) e k) do artigo 38 da Lei 24/2003, do 10 de xullo.

Subsección 2.^a Axuda á destilación de subprodutos

Artigo 54. *Autorización de destiladores.*

1. Os destiladores que desexen participar neste réxime de axudas deberán estar autorizados polo órgano competente da comunidade autónoma en cuxo territorio estean radicadas as instalacións de destilación para actuaren no marco do artigo 52 do Regulamento (UE) n.º 1308/2013 do Parlamento Europeo e do Consello, do 17 de decembro de 2013.

Así mesmo, deberán estar debidamente inscritos no rexistro territorial a que se refire o artigo 40 do Regulamento dos impostos especiais, aprobado polo Real decreto 1165/1995, do 7 de xullo, e dispor do código de actividade e do establecemento (CAE) previsto no artigo 41 dese regulamento.

2. As autorizacións terán validez en canto non se retiren expresamente ou o destilador non renuncie a elas. Non obstante o anterior, os destiladores deberán comunicar á autoridade competente, antes do inicio de cada campaña vitícola, a súa intención de prorrogar ou suspender a súa colaboración na campaña, ben como declarar que cumpriron satisfactoriamente os requisitos establecidos na normativa da Unión Europea durante a campaña anterior.

En caso de solicitar esta prórroga, a autoridade competente procederá a confirmar a autorización, se procede, e comunicará esta circunstancia aos interesados.

3. O destilador que sufra algunha variación en relación coas condicións en virtude das cales se lle concedeu a autorización deberá comunicalo de forma inmediata á autoridade competente.

4. As comunidades autónomas remitirán ao Fondo Español de Garantía Agraria antes do 1 de setembro de cada campaña a relación dos destiladores autorizados que colaboran con este réxime de axuda, con indicación do enderezo das súas instalacións.

Artigo 55. *Prazos de entrega e de destilación.*

A data límite de entrega dos subprodutos obtidos nunha determinada campaña a un destilador autorizado será o 15 de xuño desa campaña.

As operacións de destilación deberán finalizar o máis tardar o 15 de xullo da campaña vitícola de que se trate.

Artigo 56. *Axuda á destilación de subprodutos.*

1. Concederase unha axuda aos destiladores autorizados que transformen os subprodutos obtidos en territorio nacional, coa finalidade establecida no artigo 42 do Regulamento delegado (UE) 2016/1149 da Comisión, do 15 de abril de 2016, entregados para a súa destilación en alcohol cun grao alcohólico mínimo do 92 por cento vol.

Como se indica no punto 1 do artigo 42 do Regulamento delegado (UE) 2016/1149 da Comisión, do 15 de abril de 2016, o parágrafo primeiro non impedirá a transformación posterior do alcohol obtido, sobre a base da cal o importe da axuda se calculará de conformidade co artigo 18 do Regulamento de execución (UE) (UE) 2016/1150 da Comisión, do 15 de abril de 2016, a fin de cumprir o requisito do artigo 52, número 5, do Regulamento (UE) n.º 1308/2013 do Parlamento Europeo e do Consello, do 17 de decembro de 2013, relativo á utilización exclusiva para fins industriais ou enerxéticos.

2. O importe da axuda que se pagará aos destiladores autorizados pola destilación dos subprodutos é o seguinte:

- a) 1,100 €/por cento vol./hl para alcohol obtido a partir de bagazo; e
- b) 0,500 €/por cento vol./hl para alcohol obtido a partir de viño e borras.

3. Como compensación polos gastos de transporte e recolla dos subprodutos, o destilador pagará ao produtor os seguintes importes cando este último demostre ter soportado eses gastos:

- a) 0,571 €/por cento vol./hl polo bagazo entregado.
- b) 0,400 €/por cento vol./hl polo viño e borras entregados.

4. O alcohol obtido da destilación de subprodutos polo cal se concedeu unha axuda utilizarase exclusivamente con fins industriais ou enerxéticos co fin de evitar distorsións da libre competencia.

Artigo 57. *Solicitudes de axuda.*

1. A solicitude de axuda deberá ser presentada entre o 16 de outubro e o 20 de xullo de cada campaña, polo alcohol obtido durante esa campaña vitícola, ante o órgano competente da comunidade autónoma onde estean as instalacións de destilación, de maneira electrónica, na forma disposta pola comunidade autónoma, polas persoas xurídicas solicitantes, directamente ou a través dos rexistros e medios previstos no artigo 16 da Lei 39/2015, do 1 de outubro.

Así mesmo, e en aplicación do previsto no segundo parágrafo do número 5 do artigo 16 da Lei 39/2015, do 1 de outubro, os interesados persoas físicas presentarán as súas solicitudes na mesma forma prevista no parágrafo anterior.

2. As solicitudes presentaranse conforme un modelo que conteña, ao menos, os datos que figuran no anexo XIV, e acompañadas, ao menos, da seguinte documentación:

- a) Proba de destilación dos subprodutos.
- b) Relación das entregas de materias primas efectuadas polos produtores que deron orixe ao alcohol obtido.
- c) Proba do pagamento efectuado polo destilador ao produtor dos gastos de transporte, ou a súa renuncia a efectualo.
- d) Se for o caso, a xustificación do destino do alcohol obtido de acordo co indicado no artigo 59.

Se despois de verificar os datos contidos na solicitude se comprobar a existencia de datos falsos que en ningún caso poidan considerarse erros ou defectos emendables, a solicitude non se considerará admisible para recibir ningunha axuda por esta medida, isto sen prexuízo da instrución do procedemento de infracción segundo o previsto no artigo 39.1.d) da Lei 24/2003, do 10 de xullo.

Contra a resolución da comunidade autónoma poderase interpor o correspondente recurso en vía administrativa ou contencioso-administrativa, en función de que non esgote ou si esgote a vía administrativa.

Artigo 58. *Pagamento da axuda ao destilador.*

1. Non se aboará ningunha axuda polo volume de alcohol contido nos subprodutos que supere o 10 por cento da riqueza alcohólica do viño producido no ámbito nacional.

2. O destilador autorizado poderá recibir un pagamento parcial do 80 por cento da axuda polos volumes solicitados, sempre que demostre:

- a) Que efectuou o pagamento de, ao menos, a porcentaxe equivalente dos importes establecidos en concepto de transporte ao produtor, cando o efectuase este, ou presente a renuncia do mesmo a efectualo.
- b) Que o alcohol obtido da destilación polo cal se solicita a axuda foi destinado a fins enerxéticos ou industriais, ou que foi desnaturalizado, tal e como establece o artigo 59.

En caso de non dispor dos comprobantes indicados, poderá recibir un anticipo do 80 por cento da axuda, para o cal se exixirá a presentación dunha garantía igual ao importe do anticipo.

Nos casos en que se aboou un anticipo, a garantía liberarase cando se dispoña dos comprobantes indicados anteriormente.

3. En cada campaña, e unha vez que se coñezan as cantidades efectivamente entregadas á destilación polas cales se solicita a axuda e a cantidade de viño producido, contrastarase o volume do alcohol polo cal se solicita axuda contido nos produtos entregados coa riqueza alcohólica do viño producido no ámbito nacional.

Cando a cantidade de alcohol pola cal se solicite axuda nunha campaña determinada supere o 10 por cento da riqueza alcohólica citada no parágrafo anterior, reducirase a axuda en función da porcentaxe de exceso. O Fondo Español de Garantía Agraria fixará a porcentaxe de redución, de modo que se garanta que non se excede o volume máximo de alcohol que pode percibir axuda. Así mesmo, en caso necesario, a Dirección Xeral de Producións e Mercados Agrarios establecerá unha porcentaxe de redución para asegurar que non se supera o límite da dispoñibilidade orzamentaria establecido para a medida.

4. Unha vez establecida a contía definitiva da axuda, a autoridade competente procederá ao pagamento da axuda correspondente ou, se for o caso, do saldo antes do 16 de outubro da campaña seguinte.

5. Antes de se efectuar o pagamento deberase comprobar que o destilador autorizado realizou, se for o caso, o aboamento ao produtor da totalidade do gasto de transporte que lle corresponda, reducida, se corresponde, en idéntica proporción á minoración global da axuda establecida no segundo parágrafo do número 3.

En caso de non xustificar o aboamento, o destilador autorizado deberá devolver as cantidades anticipadas ou executarase a garantía presentada pola dita contía.

6. Se no momento do pagamento do saldo da axuda non foi presentado o xustificante do destino do alcohol polo destilador, deberase ampliar a garantía polo importe pendente de pagamento incrementado nun 20 por cento.

7. En caso de que non se presente a dita ampliación de garantía, o destilador autorizado deberá devolver as cantidades anticipadas ou executarase a garantía presentada pola dita contía.

8. En calquera caso, o destilador autorizado deberá enviar os xustificantes do destino do alcohol obtido á autoridade competente antes do 31 de xaneiro da campaña seguinte; en caso contrario o destilador autorizado deberá reintegrar as cantidades recibidas ás partidas cuxo destino non se xustificou ou executarase a garantía presentada pola dita contía. O Ministerio de Agricultura e Pesca, Alimentación e Medio Ambiente poderá ampliar a data indicada cando a situación do mercado o exixa.

9. Non obstante o anterior, para efectos de cálculo do alcohol que ha chegar a destino, deberanse ter en conta as porcentaxes de perda de acordo co indicado no artigo 59.

Artigo 59. *Xustificación do destino do alcohol obtido.*

1. O alcohol que resulte da destilación á cal se concedeu axuda deberase utilizar unicamente con fins industriais ou enerxéticos a fin de evitar distorsións da libre competencia.

O destilador autorizado deberá presentar como xustificante deste destino ante a autoridade competente, no prazo máximo de dez días hábiles desde que finalice a saída de cada lote, un certificado de saídas diarias do alcohol, mencionando, ao menos, a cantidade e o grao volumétrico do alcohol que saíu e a identificación do produtor, ben como unha copia do documento administrativo electrónico previsto no artigo 22 do Regulamento dos impostos especiais, aprobado polo Real decreto 1165/1995, do 7 de xullo, co selo do destinatario aceptando o produto e o compromiso escrito do destinatario de utilizar ese alcohol exclusivamente con estes fins.

2. Na xustificación do destino do alcohol que resulte da destilación á cal se concedeu axuda admitiranse as seguintes porcentaxes de perda, incluídas nas alíneas e) e g) do artigo 90.1 e alíneas d) e e) do artigo 90.2 do Regulamento dos impostos especiais, aprobado mediante o Real decreto 1165/1995, do 7 de xullo:

a) 0,50 por cento das cantidades de alcohol almacenadas por trimestre de almacenamento como perda de alcohol debida á evaporación.

b) 0,50 por cento das cantidades de alcohol retiradas dos almacéns como perda de alcohol debida a un ou varios transportes terrestres.

3. Poderase considerar que o alcohol obtido tivo un uso industrial ou enerxético se foi desnaturalizado, de acordo co establecido no Regulamento dos impostos especiais, aprobado mediante o Real decreto 1165/1995, do 7 de xullo, cun produto que impida que se utilice para usos distintos do industrial ou enerxético.

En calquera caso, a autoridade competente deberá obter do destilador autorizado información sobre o destino final deste alcohol desnaturalizado.

Sección 4.^a Innovación

Artigo 60. *Ámbito de aplicación.*

Co obxecto de mellorar a comercialización e a competitividade dos produtos vitivinícolas, concederáse apoio aos investimentos tanxibles ou intanxibles destinados ao desenvolvemento de novos produtos, procedementos e tecnoloxías relacionados cos produtos que se describen no anexo VII, parte II, do Regulamento (UE) n.º 1308/2013 do Parlamento Europeo e do Consello, do 17 de decembro de 2013, e que se producen no territorio español.

Artigo 61. *Beneficiarios.*

1. Poderán presentar solicitudes para acollerse ao financiamento da medida de innovación as empresas vitivinícolas que no momento da solicitude produzan ou comercialicen os produtos mencionados no anexo VII, parte II, do Regulamento (UE) n.º 1308/2013 do Parlamento Europeo e do Consello, do 17 de decembro de 2013, as organizacións de produtores de viño recoñecidas de acordo co artigo 152 do citado regulamento e as asociacións temporais ou permanentes de dous ou máis produtores dos produtos mencionados no anexo VII parte II do citado regulamento.

Non obstante, cando se trate de empresas cuxa actividade sexa unicamente a comercialización, ao menos un 80 por cento da súa facturación do último exercicio fechado deberá proceder da comercialización dos produtos do anexo IV, parte II, do Regulamento (UE) n.º 1308/2013 do Parlamento Europeo e do Consello, do 17 de decembro de 2013.

2. Nas asociacións temporais ou permanentes de dous ou máis produtores designarase un representante da agrupación. O representante da agrupación deberá ter poderes suficientes para poder cumprir as obrigacións que corresponden á citada agrupación como beneficiaria das axudas, tal e como establece o artigo 11.3 da Lei 38/2003, do 17 de novembro.

O representante asumirá, ao menos, as seguintes funcións:

a) Exercer a tarefa de dirección e coordinación da agrupación, incluída a redacción do proxecto, ben como a elaboración da proposta de acordos e, se for o caso, creación formal da estrutura xurídica común.

b) Actuar como interlocutor único entre a agrupación e a Administración.

c) Presentar a solicitude da axuda en nome da agrupación, diferenciando, se for o caso, os compromisos de execución de cada membro da agrupación, o importe de subvención aplicable por cada un deles de acordo co artigo 11.3 da Lei 38/2003, do 17 de novembro, ben como as actuacións e o orzamento correspondente.

d) Obter de cada membro toda a información requirida pola Administración, incluíndo os indicadores de seguimento e avaliación que resulten aplicables.

e) Solicitar e percibir o pagamento da subvención e distribuílo entre os membros da agrupación, de acordo coa resolución de outorgamento da axuda.

f) Coordinar e facilitar as actuacións de control da axuda.

3. Os proxectos poderán contar coa participación de centros de investigación e desenvolvemento.

As organizacións interprofesionais poderán asociarse aos proxectos.

4. Non poderán ser beneficiarios desta axuda aqueles solicitantes en que conorra algunha das seguintes circunstancias:

a) Encontrarse en situación de crise, segundo se define nas directrices sobre axudas estatais de salvamento e de reestruturación de empresas non financeiras en crise (Comunicación 2014/C 249/01 da Comisión, do 31 de xullo de 2014).

b) Encontrarse en proceso de ter solicitado a declaración de concurso voluntario, ter sido declarada insolvente en calquera procedemento, estar declarada en concurso, salvo que neste adquirise a eficacia un convenio, estar suxeitos a intervención xudicial ou ter sido inhabilitada conforme a Lei 22/2003, do 9 de xullo, sen que concluíse o período de inhabilitación fixado na sentenza de cualificación do concurso.

c) Non demostrar que se encontra ao día nas súas obrigacións tributarias e coa Seguridade Social, ben como nas súas obrigacións por reintegro de subvencións.

d) Ter percibido subvencións, para a mesma finalidade e obxecto, que puidesen establecer outras administracións públicas ou outros entes públicos ou privados, nacionais ou internacionais.

Artigo 62. *Criterios de admisibilidade e custos subvencionables.*

1. As solicitudes examínanse baseándose nos criterios seguintes:

a) Os proxectos e as súas accións subxacentes defínense claramente, describen as accións de investimento e mencionan o custo estimado.

b) Garantías de que os custos da operación proposta non superan os prezos normais do mercado.

Os gastos susceptibles de auxilio presentados cunha solicitude de axuda deberán cumprir o seguinte criterio de moderación de custos: con carácter xeral, o solicitante deberá presentar, como mínimo, tres ofertas de diferentes provedores, con carácter previo á prestación do servizo ou á entrega do ben, salvo que polas súas especiais características non exista no mercado suficiente número de entidades que os presten ou subministren, nos casos de gastos de compra de maquinaria, instalacións, subministracións e servizos, cando o importe do gasto subvencionable, excluído o IVE ou o IXIC, iguale ou supere os 18.000 euros.

A escolla entre as ofertas presentadas, que tamén se deberá achegar xunto coa solicitude de pagamento, realizarase conforme criterios de eficacia e economía, e débese xustificar expresamente a escolla cando non recaia na proposta económica máis vantaxosa.

c) Garantías de que os beneficiarios teñen acceso a recursos técnicos e financeiros suficientes para garantir a execución efectiva do proxecto.

2. Os proxectos para os cales se solicite axuda terán por obxecto investimentos tanxibles ou intanxibles, incluída a transferencia de coñecementos, para o desenvolvemento de:

a) Novos produtos relacionados co sector vitivinícola ou subprodutos do viño.

b) Novos procedementos e tecnoloxías necesarios para o desenvolvemento dos produtos vitícolas.

c) Outros investimentos en novos procedementos e tecnoloxías que engadan valor en calquera fase da cadea de subministración.

3. Os custos subvencionables incluírán proxectos piloto, accións preparatorias en forma de desenvolvemento e probas de deseños, produtos, procesos ou tecnoloxías, ben como investimentos tanxibles ou intanxibles relacionados con eles, antes do emprego con fins comerciais dos novos produtos, procesos ou tecnoloxías desenvolvidos.

4. Consideraranse subvencionables os seguintes custos:
 - a) Custos de persoal, sempre que se produzan con motivo da preparación, execución, avaliación ou seguimento do proxecto subvencionado. Inclúense, entre outros, os custos do persoal contratado polo beneficiario especificamente con motivo do proxecto, ben como os custos correspondentes á proporción das horas de traballo investidas no proxecto polo persoal permanente do beneficiario.

Para efectos da xustificación dos custos de persoal, o beneficiario deberá presentar xustificantes que expoñan os detalles do traballo realmente efectuado en relación co proxecto.

Para efectos da determinación dos custos de persoal permanente do beneficiario, calcularase a tarifa horaria aplicable dividindo os últimos custos salariais anuais brutos documentados dos empregados concretos que traballaron no proxecto entre 1.720 horas.
 - b) Custos de instrumental e material, na medida e durante o período en que se utilicen para o proxecto.
 - c) Custos de adaptación de instalacións, na medida en que se utilicen para o proxecto e en canto dure este.
 - d) Custos administrativos xerais directamente ligados ao proxecto, sempre que se produzan con motivo da preparación, execución, seguimento do proxecto subvencionado e non superen o 4 por cento dos custos subvencionables totais do proxecto.
5. Non terán a consideración de subvencionables os gastos descritos no anexo XV.
6. Para que o IVE ou o IXIC non recuperable sexa subvencionable, un perito mercantil ou un auditor legal do beneficiario deberá demostrar que o importe pagado non se recuperou e se consigna como un gasto na contabilidade do beneficiario. Para tal efecto, se o beneficiario solicitou da Administración tributaria a súa cualificación como entidade ou establecemento privado de carácter social de acordo co disposto no artigo 20.tres da Lei 37/1992, do 28 de decembro, do imposto sobre o valor engadido, deberá achegar o documento expedido para o efecto por aquela.

Artigo 63. *Características dos proxectos.*

1. Os proxectos deberán demostrar que se aplica un descubrimento previamente conseguido mediante investigación e que con isto se melloran os produtos, procedementos ou tecnoloxías empregadas polo solicitante ou que se engade valor en calquera fase da cadea de subministración.
2. Os proxectos deberán ter claramente definido o obxectivo final, que non se poderá alterar mediante modificación segundo o establecido no artigo 67 e que se deberá cumprir para ter dereito á axuda segundo o establecido no artigo 70.
3. Os proxectos de innovación estarán claramente definidos, especificando as accións e detallando os conceptos de gasto que compoñen cada acción e os custos estimados de cada unha delas.
4. Os proxectos poderán ser anuais ou plurianuais, pero a resolución de concesión só poderá recoller accións que haxa que xustificar ante a Administración competente no exercicio FEAGA 2018.

A xustificación por parte do beneficiario ante a Administración competente deberase realizar antes do 30 de abril de 2018, ben que a autoridade competente da comunidade autónoma poderá establecer outros prazos máis restritivos.

O incumprimento destes prazos por razóns imputables ao beneficiario poderá motivar que a súa concesión de axuda sexa deixada sen efecto.

Artigo 64. *Presentación de solicitudes.*

1. Os interesados que reúnan as condicións exixidas presentarán a súa solicitude dirixida ao órgano competente da comunidade autónoma en que se encontre o establecemento en que se vaia realizar o investimento.

2. As solicitudes das persoas xurídicas deberanse presentar ante o órgano competente da comunidade autónoma en que radique o solicitante, de maneira electrónica, na forma disposta pola comunidade autónoma, directamente ou a través dos rexistros e medios previstos no artigo 16 da Lei 39/2015, do 1 de outubro.

Así mesmo, e en aplicación do previsto no segundo parágrafo do número 5 do artigo 16 da Lei 39/2015, do 1 de outubro, os interesados persoas físicas presentarán as súas solicitudes na mesma forma prevista no parágrafo anterior.

3. Tanto o modelo de solicitude como a documentación correspondente poderán ser establecidos pola comunidade autónoma.

4. A solicitude deberá incluír, ademais da documentación establecida pola comunidade autónoma, o seguinte:

a) Declaración responsable dos solicitantes de non teren recibido ningunha axuda incompatible, ben como as axudas, se for o caso, solicitadas ou obtidas, para a mesma finalidade, procedentes das administracións públicas ou doutros entes públicos ou privados, segundo o modelo que se establecerá na correspondente convocatoria.

b) Declaración responsable dos solicitantes, na cal indiquen as fontes e os importes do financiamento solicitado procedente das administracións públicas ou doutros entes públicos ou privados, para a mesma finalidade.

c) No caso de que o solicitante sexa unha agrupación, deberá presentar, ademais:

1.º Poderes do representante da agrupación para realizar as funcións establecidas no artigo 61.2, outorgados por todos os membros dela.

2.º Declaración responsable de colaboración nos labores de seguimento e avaliación.

5. O expediente deberá incluír todos os datos do proxecto de innovación.

6. Os proxectos deberán, en todo caso, cumprir o disposto neste real decreto e na normativa da Unión Europea relativa á medida de innovación, ben como a demais lexislación aplicable.

7. Os proxectos deberán estar o suficientemente desenvolvidos como para que se poida avaliar a súa conformidade coa normativa e de acordo cos criterios establecidos no anexo XVI.

Artigo 65. *Tramitación de solicitudes.*

1. As comunidades autónomas examinarán as solicitudes canto á súa conformidade con este real decreto e requirirán ao solicitante, se for o caso, a presentación da documentación ou información que se debe emendar, ou da adicional pertinente.

2. De acordo cos criterios de valoración establecidos no anexo XVI, as comunidades autónomas elaborarán unha lista provisoria cos proxectos seleccionados priorizados e remitirana ao Ministerio de Agricultura e Pesca, Alimentación e Medio Ambiente antes do 1 de maio de 2017, no formato electrónico, de conformidade co anexo XVII do presente real decreto. Á lista xuntaráse a documentación dos proxectos seleccionados recollidos no mencionado anexo XVII.

3. A partir das listas provisorias dos proxectos seleccionados polas comunidades autónomas, a Dirección Xeral da Industria Alimentaria elaborará a proposta de lista definitiva e someteraa ao informe vinculante da Conferencia Sectorial de Agricultura e Desenvolvemento Rural, tendo en conta a dotación orzamentaria dispoñible para o exercicio FEAGA 2018.

Non se incluírán na proposta de lista definitiva aqueles proxectos de innovación que na fase de valoración non alcancen un mínimo de 25 sobre 103 puntos.

4. Para a resolución das situacións de empate de puntuación que se poida presentar na confección da lista definitiva sinalada no punto anterior teranse en conta os seguintes criterios de prioridade, na orde que se indica:

1.º En primeiro termo, serán prioritarios aqueles proxectos cuxo solicitante sexa unha entidade asociativa prioritaria recoñecida de acordo co Real decreto 550/2014, do 27 de xuño.

2.º Se aínda persiste a situación de empate, serán prioritarios aqueles proxectos cuxo solicitante sexa unha organización de produtores de viño recoñecida de acordo co artigo 152 do Regulamento (UE) n.º 1308/2013 do Parlamento Europeo e do Consello, do 17 de decembro de 2013.

3.º Se aínda persiste a situación de empate, serán prioritarios aqueles proxectos cuxo solicitante sexa unha cooperativa.

4.º Se aínda persiste a situación de empate, serán prioritarios aqueles proxectos cuxo solicitante sexa unha peme.

Artigo 66. *Resolución.*

1. Unha vez que a Conferencia Sectorial de Agricultura e Desenvolvemento Rural emita informe sobre a lista definitiva dos proxectos de innovación seleccionados, as comunidades autónomas ditarán as resolucións correspondentes e notificarano aos beneficiarios. O prazo máximo para a resolución e notificación do procedemento será de seis meses contados a partir do día seguinte á finalización do prazo de presentación das solicitudes.

A comunidade autónoma emitirá as correspondentes resolucións denegatorias motivadas para aqueles casos en que se desestime a solicitude de axuda. Transcorrido o prazo de seis meses sen se ter notificado aos interesados resolución ningunha, estes poderán entender desestimada a súa solicitude de acordo co disposto no artigo 25.5 da Lei 38/2003, do 17 de novembro.

Nas resolucións indicaranse o importe dos investimentos considerados como subvencionables, a axuda concedida e o calendario de execución aprobado.

Cando o solicitante sexa unha asociación temporal ou permanente de dous ou máis produtores, a resolución deberá diferenciar, se for o caso, o importe de subvención aplicable por cada un deles de acordo co artigo 11.3 da Lei 38/2003, do 17 de novembro.

Contra a resolución da comunidade autónoma poderase interpor o correspondente recurso en vía administrativa ou contencioso-administrativa, en función de que non esgote ou si esgote a vía administrativa.

2. No caso de resolución positiva, o beneficiario deberá achegar nos dous meses seguintes á notificación da resolución de concesión ante o órgano competente da comunidade autónoma correspondente unha aceptación expresa dos termos da concesión da subvención.

3. A comunidade autónoma deberá comunicar ao Ministerio de Agricultura e Pesca, Alimentación e Medio Ambiente antes do 1 de decembro de 2017 as aceptacións, renuncias ou desistencias que se producisen dentro do procedemento, para o efecto de poder dispor dos fondos que se liberen, se for o caso.

Artigo 67. *Modificación dos proxectos.*

1. O beneficiario poderá solicitar a modificación do proxecto de innovación inicialmente aprobado. A solicitude de modificación deberase presentar antes do 1 de febreiro de 2018.

2. Calquera modificación do proxecto de innovación aprobado que supoña un cambio de beneficiario, orzamento, prazos, variación das accións previstas ou calendario de execución, ben como de calquera condición específica indicada na resolución de concesión, requirirá a autorización previa do órgano competente da comunidade autónoma despois da presentación da correspondente solicitude.

En todo caso, para a súa admisibilidade teranse en conta as condicións e limitacións sinaladas a seguir.

- a) Non se admitirán modificacións que alteren o obxectivo final do proxecto.

b) Non se admitirán nin se aprobarán modificacións que supoñan un cambio de beneficiario, salvo que o novo sexa resultante dun proceso de fusión ou dunha transformación do tipo de sociedade, non se alteren as condicións tidas en conta para a concesión da axuda.

c) Non se admitirán modificacións que supoñan a non execución nas condicións establecidas como mínimo do 70 por cento do investimento subvencionable inicialmente aprobado.

3. Independentemente do citado neste artigo, o órgano competente da comunidade autónoma poderá excepcionalmente aprobar modificacións da resolución de concesión que non se axusten ás condicións indicadas nos números anteriores, nos casos de forza maior ou circunstancias excepcionais na acepción do artigo 2.2 do Regulamento (UE) n.º 1306/2013 do Parlamento Europeo e do Consello, do 17 de decembro de 2013.

4. As modificacións que supoñan un incremento dos orzamentos aprobados para os proxectos non suporán incremento da subvención concedida.

5. Se, froito dunha modificación, se produciren alteracións que afecten a puntuación outorgada de acordo co procedemento descrito no artigo 66.2, o órgano competente da comunidade autónoma deberá proceder a reavaliar a solicitude e determinar a cifra da súa nova puntuación.

A nova valoración así outorgada como consecuencia da revisión deberá ser comparada coa lista definitiva de proxectos seleccionados, unha vez sometida ao informe da Conferencia Sectorial de Agricultura e Desenvolvemento Rural, na cal se incluíu a concesión da subvención orixinal.

Para garantir que os termos económicos da concesión de subvención non superan os que nesa lista corresponderían coa súa nova puntuación, a concesión de subvención poderase minorar e pode chegar a ser deixada sen efecto na súa totalidade.

6. As comunidades autónomas comunicarán as modificacións suxeitas a autorización que se produciron ao Ministerio de Agricultura e Pesca, Alimentación e Medio Ambiente antes do 1 de abril de 2018, para o efecto de poder dispor dos fondos que se liberen, se for o caso.

Artigo 68. *Obrigacións específicas que emanan da agrupación de beneficiarios.*

1. Obterán a condición de beneficiarios da subvención todos os membros da agrupación.

2. Os beneficiarios manteranse na agrupación desde o momento de presentación da solicitude até o cesamento das obrigacións de control financeiro establecidas pola Lei 38/2003, do 17 de novembro.

Artigo 69. *Financiamento.*

Aplicaranse á contribución da Unión Europea os tipos de axuda previstos no artigo 51 do Regulamento (UE) n.º 1308/2013 do Parlamento Europeo e do Consello.

Artigo 70. *Pagamentos.*

1. A solicitude de pagamento final irá acompañada, ao menos, da seguinte documentación:

a) Memoria de execución valorada, coa relación de gastos, facturas e xustificantes de pagamento. Ademais, a memoria de execución incluírá a relación das diferenzas existentes entre os traballos previstos e os realizados e, se for o caso, a xustificación das causas excepcionais ou de forza maior.

b) Declaración do beneficiario de non percibir ningunha outra axuda para a mesma finalidade e obxecto nin se encontrar inmerso nun proceso de reintegro de subvencións.

c) Declaración responsable relativa á conta bancaria en que solicita o ingreso da subvención, cando esta conta non sexa coincidente coa conta única.

d) Facturas ou documentos contables de valor probatorio equivalente, respecto do gasto, e acreditación dos pagamentos.

e) Extracto bancario da conta única a través da cal se realizaron os pagamentos.

f) Calquera outra documentación exixida por normativa de obrigado cumprimento, ben como a indicada na resolución de concesión co obxecto de demostrar algunha das circunstancias ou requisitos necesarios para conceder a axuda.

2. Todos os pagamentos do proxecto que realice o solicitante a partir da data de presentación da solicitude de axuda deberanse realizar a través dunha conta bancaria única dedicada exclusivamente a este fin.

3. O pagamento da axuda estará subordinado á presentación das contas xustificativas do investimento, verificadas por un auditor de contas ou sociedade de auditoría inscritos no Rexistro Oficial de Auditores de Contas ou, na súa falta, á verificación por parte da comunidade autónoma das facturas e documentos mencionados anteriormente. Esta comprobación incluírá, como mínimo, unha inspección *in situ* para cada expediente de axuda.

4. O beneficiario terá dereito á axuda unha vez que se confirme que o proxecto previsto na solicitude de pagamento se executou totalmente, se cumpriu o obxectivo final do proxecto e foi obxecto de controis administrativos e sobre o terreo. Cando por causas de forza maior ou circunstancias excepcionais na acepción do artigo 2.2 do Regulamento 1306/2013 do Parlamento Europeo e do Consello, do 17 de decembro de 2013, non se poidan executar todas as accións individuais, poderá pagarse a axuda correspondente ás accións restantes executadas.

5. Só se poderá estimar favorablemente unha solicitude de pagamento cando quede acreditada a situación do beneficiario respecto das súas obrigacións tributarias e fronte á Seguridade Social, ben como polo reintegro de subvencións.

6. No caso de que o beneficiario sexa unha agrupación, non poderá realizarse o pagamento da subvención en canto que algún dos membros da agrupación non estea ao día nas obrigacións establecidas no punto anterior.

Artigo 71. *Avaliación e seguimento da medida.*

1. O Ministerio de Agricultura e Pesca, Alimentación e Medio Ambiente intercambiará información por vía electrónica coas comunidades autónomas e o sector para garantir o seguimento da medida e promover o seu correcto funcionamento.

Para estes efectos, constituirase unha base de datos que incluírá os datos das solicitudes que constan nos órganos competentes das comunidades autónomas, que se relacionan no anexo XVIII.

2. As comunidades autónomas remitirán ao Ministerio de Agricultura e Pesca, Alimentación e Medio Ambiente, antes do 1 de novembro de cada ano, e referido ao exercicio financeiro precedente, un informe anual do resultado dos proxectos de innovación.

O Ministerio de Agricultura e Pesca, Alimentación e Medio Ambiente, coa información facilitada polas comunidades autónomas a través da base de datos mencionada no número anterior e dos informes anuais do parágrafo anterior, realizará anualmente un informe xeral de avaliación da medida, acompañado, se for o caso, de propostas de modificación.

Sección 5.ª Colleita en verde

Artigo 72. *Ámbito de aplicación.*

1. A fin de evitar crises de mercado e recobrar o equilibrio da oferta e a demanda no mercado vitivinícola, o Ministerio de Agricultura e Pesca, Alimentación e Medio Ambiente poderá decidir antes do 15 de abril de cada ano, logo de solicitude debidamente xustificada dunha ou varias comunidades autónomas, conceder unha axuda á colleita en verde

recollida no artigo 47 do Regulamento (UE) n.º 1308/2013 do Parlamento Europeo e do Consello, do 17 de decembro, nunha ou en parte da totalidade do territorio nacional.

O Ministerio de Agricultura e Pesca, Alimentación e Medio Ambiente, en función dunha análise da situación de mercado fixará, entre outros, a superficie máxima que poderá ter dereito á axuda á colleita en verde para retirar do mercado un volume de produción segundo un rendemento medio por hectárea, ben como o coeficiente especificado no último parágrafo do artigo 81.3, que non poderá ser superior ao 50 por cento.

2. Entenderase por colleita en verde a destrución ou eliminación total dos acios de uvas cando aínda están inmaturos, de maneira que se reduza a cero o rendemento da parcela, sen que poidan existir uvas sen vendimar na parcela de viña obxecto da axuda.

Artigo 73. *Beneficiarios.*

1. Poderanse acoller á axuda á colleita en verde os viticultores cuxas viñas se destinen á produción de uva para vinificación.

2. Non poderán ser beneficiarios os que contraveñan a normativa vixente tanto en materia de plantacións de viña para calquera das superficies de viña da súa explotación como en materia das declaracións obrigatorias segundo o artigo 18 do Regulamento (CE) n.º 436/2009 da Comisión, do 26 de maio de 2009.

Artigo 74. *Requisitos de admisibilidade.*

1. Só se poderán acoller á axuda á colleita en verde as solicitudes de parcelas completas que se destinen á produción de uva para vinificación. As solicitudes realizaranse por unha superficie mínima igual ou superior a 0,3 hectáreas.

2. Non poderá recibir axuda á colleita en verde unha mesma superficie en dúas campañas consecutivas nin parcelas de viña plantadas nas tres campañas anteriores a aquela en que se solicita a axuda para a colleita en verde.

3. A colleita en verde poderase realizar de forma manual, mecánica e química.

Artigo 75. *Presentación de solicitudes de axuda.*

1. Cando se adopte a decisión segundo o artigo 72.1, a solicitude de axuda das persoas xurídicas deberase presentar, entre o 15 de abril e o 15 de maio, ante o órgano competente da comunidade autónoma en que estean situadas as parcelas de viña onde se solicite realizar a colleita en verde, de maneira electrónica, na forma disposta pola comunidade autónoma, directamente ou a través dos rexistros e medios previstos no artigo 16 da Lei 39/2015, do 1 de outubro.

Así mesmo, e en aplicación do previsto no segundo parágrafo do número 5 do artigo 16 da Lei 39/2015, do 1 de outubro, os interesados persoas físicas presentarán as súas solicitudes na mesma forma prevista no parágrafo anterior.

2. Os viticultores deberán fornecer, xunto coa solicitude de axuda, como mínimo a seguinte información:

a) Localización e parcela sobre a cal se quere realizar a colleita en verde.

b) O rendemento medio da parcela sobre a cal se quere efectuar a colleita en verde considerando a media das tres últimas campañas. No caso de non se coñeceren as producións específicas das parcelas obxecto da solicitude de axuda, o rendemento medio calcularase tendo en conta a produción total declarada segundo o tipo de viño no cal se encontra a parcela obxecto de solicitude de axuda, dividido entre a superficie total declarada para ese tipo de viño. Esta produción total segundo o tipo de viños corresponde á declarada segundo a desagregación dos datos de viña recollida no cadro B do anexo I b do Real decreto 739/2015, do 31 de xullo, sobre declaracións obrigatorias no sector vitivinícola.

c) A variedade de uva e o tipo de viño producido segundo a declaración de colleita da campaña anterior.

d) Forma de realización (medios propios ou por empresa) e método da colleita en verde.

3. O órgano competente da comunidade autónoma remitirá ao Ministerio de Agricultura e Pesca, Alimentación e Medio Ambiente, antes do 1 de xuño de cada ano, a información sobre as solicitudes presentadas unha vez comprobadas as condicións de elixibilidade de acordo co número 1 do artigo 23 do Regulamento de execución (UE) 2016/1150 da Comisión, do 15 de abril de 2016. Para cada solicitude deberán remitirse os datos mínimos do anexo XIX.

As solicitudes que non cumpran os requisitos de admisibilidade do número 1 aplicaráselles o previsto no número 6 do artigo 23 do Regulamento de execución (UE) 2016/1150 da Comisión, do 15 de abril de 2016.

Artigo 76. *Criterios de prioridade.*

1. No caso de que a superficie solicitada total ou o volume de viño estimado de retirada supere as estimacións fixadas polo Ministerio de Agricultura e Pesca, Alimentación e Medio Ambiente determinadas no artigo 72, darase prioridade ás solicitudes que impliquen unha maior retirada potencial de viño e ás que proveñan de explotacións de titularidade compartida de acordo coa Lei 35/2011, do 4 de outubro.

Artigo 77. *Aceptación de solicitudes.*

1. Unha vez acordada pola Conferencia Sectorial de Agricultura e Desenvolvemento Rural a dispoñibilidade orzamentaria, para un exercicio concreto, para a medida da colleita en verde, o Ministerio de Agricultura e Pesca, Alimentación e Medio Ambiente comunicará ás comunidades autónomas antes do 1 de xullo as solicitudes para as cales existe dispoñibilidade orzamentaria.

2. As comunidades autónomas resolverán as solicitudes e notificaranas aos interesados.

Contra a resolución da comunidade autónoma poderase interpor o correspondente recurso en vía administrativa ou contencioso-administrativa, en función de que non esgote ou si esgote a vía administrativa.

3. A fin de poderense efectuar os controis oportunos, os beneficiarios comunicarán á autoridade competente a data de execución da colleita en verde e tal comunicación poderase considerar como solicitude de pagamento da axuda. A colleita en verde será realizada polo beneficiario antes do 20 de xullo.

Artigo 78. *Controis.*

1. De acordo co artigo 43 do Regulamento de execución (UE) 2016/1150 da Comisión, do 15 de abril de 2016, os controis realizaranse antes do 31 de xullo de cada ano.

2. Para os efectos do cumprimento do artigo 18 do Regulamento delegado (UE) 2016/1149 da Comisión, do 15 de abril de 2016, as comunidades autónomas deberán garantir que as superficies consideradas se manteñan en boas condicións vexetativas e que se cumpran as disposicións ambientais e as fitosanitarias.

Artigo 79. *Cálculo da axuda.*

1. A axuda á colleita en verde calcularase sumando unha compensación polos custos directos de destrución ou eliminación dos acios de uvas e outra pola perda de ingresos vinculada á destrución ou á eliminación dos acios de uva, axustándose ao establecido no artigo 9 do Regulamento de execución (UE) 2016/1150 da Comisión, do 15 de abril de 2016.

2. As comunidades autónomas que prevexan solicitar esta axuda, de conformidade co número 1 do artigo 72 do presente real decreto, fixarán unha compensación pola perda de ingresos que se calculará como o 25 por cento do valor medio da uva das tres últimas

campañas no ámbito territorial onde se encontre a parcela de viña obxecto da vendima en verde, que a comunidade autónoma deberá definir.

3. As comunidades autónomas que prevexan solicitar esta axuda fixarán un importe máximo por hectárea dos custos directos de destrución ou eliminación dos acios de uva para cada unha das formas de eliminación, manual, mecánica ou química. No caso de que se utilice máis dun método de colleita en verde nunha mesma superficie, a compensación basearase no método menos custoso.

4. Segundo o establecido no artigo 45 do Regulamento delegado (UE) 2016/1149 da Comisión, do 15 de abril de 2016, as contribucións en especie en forma de provisión de traballo que non fose obxecto de ningún pagamento en efectivo xustificadas con facturas ou documentos de valor probatorio equivalente poderán optar á axuda sempre que a comunidade autónoma o prevexa e o comunique ao Ministerio de Agricultura e Pesca, Alimentación e Medio Ambiente para a súa comunicación á Comisión no Programa de apoio.

Para efectos do cálculo do importe da axuda correspondente ás contribucións en especie teranse en conta os números 2.b, 3.b e 3.c do artigo 45 do Regulamento delegado (UE) 2016/1149 da Comisión, do 15 de abril de 2016.

A fin de cumprir co establecido no artigo 3 a) vi) do Regulamento de execución (UE) 2016/1150 da Comisión, do 15 de abril de 2016, o método de cálculo aplicado por cada comunidade autónoma para determinar o valor do traballo propio e a súa adaptación anual deberase comunicar á Dirección Xeral de Producións e Mercados Agrarios do Ministerio de Agricultura e Pesca, Alimentación e Medio Ambiente antes do 1 de febreiro de cada ano.

A compensación polos custos directos de destrución ou eliminación dos acios de uvas será o resultado de aplicar o coeficiente que fixará o Ministerio de Agricultura e Pesca, Alimentación e Medio Ambiente ao importe máximo establecido pola comunidade autónoma. O montante percibido en ningún caso poderá ser superior ao que resulte da aplicación dese coeficiente sobre o gasto efectivamente realizado e acreditado mediante factura e xustificante de pagamento cando a colleita en verde non fose executada polo propio beneficiario.

5. As comunidades autónomas que prevexan solicitar a axuda enviarán ao Ministerio de Agricultura e Pesca, Alimentación e Medio Ambiente, xunto coa solicitude mencionada no citado número, as cantidades fixadas nos números 2 e 3 do presente artigo.

6. Para determinar o importe da axuda pola colleita en verde dunha superficie de viña, as comunidades autónomas realizarán unha medición da parcela en que se realizou a colleita en verde seguindo o método establecido no artigo 44 do Regulamento de execución (UE) 2016/1150 da Comisión, do 15 de abril de 2016.

7. Non se pagará a axuda en caso de perda total ou parcial da produción antes da data de colleita en verde como consecuencia dun desastre natural.

Para efectos do cumprimento do parágrafo anterior, considerarase que existiu un desastre natural cando por condicións meteorolóxicas como as xeadas, a sarabia, as chuvias ou a seca se destrúa máis do 30 por cento da produción calculada como a media anual dun agricultor determinado durante o trienio precedente ou dunha media trienal baseada nos cinco anos anteriores que exclúa a cifra máis elevada e a cifra máis baixa.

Artigo 80. *Pagamento da axuda aos beneficiarios.*

1. A axuda pagarase polo importe calculado segundo o artigo 79, e unha vez que se comprobe sobre o terreo que se executou correctamente a operación.

2. Se o viticultor non executa a operación na superficie total para a cal se aprobou a axuda, terase en conta a diferenza entre a superficie aprobada ou modificada segundo o artigo 78 e a superficie realmente executada determinada polos controis sobre o terreo. Se esta diferenza non é maior do 20 por cento, calcularase sobre a base da superficie determinada polos controis sobre o terreo. Se a diferenza é maior ou igual ao 20 por cento e inferior ao 50 por cento calcularase sobre a base da superficie determinada polos

controis sobre o terreo e reducida no dobre da diferenza comprobada. No entanto, non terá dereito á axuda en caso de que esta diferenza de superficies supere o 50 por cento.

3. A comunidade autónoma deberá emitir unha resolución de pagamento e realizar o pagamento ao beneficiario o antes posible e o máis tardar nun prazo máximo de doce meses desde a data da presentación da solicitude de pagamento válida e completa.

Artigo 81. Sancións.

No caso de que un viticultor non execute a colleita en verde nas parcelas aprobadas, será considerado infracción leve segundo o previsto no artigo 38.1.g) da Lei 24/2003, do 10 de xullo, e será sancionado de conformidade co establecido no artigo 42.1 da citada lei, salvo causas de forza maior ou circunstancias excepcionais.

Artigo 82. Condicionalidade.

Se se constata que un beneficiario, en calquera momento durante un ano a partir do 1 de xaneiro do ano natural en que se produciu o primeiro pagamento en virtude da presente sección, non respectou na súa explotación os requisitos legais de xestión e as boas condicións agrarias e ambientais a que se refiren os artigos 91, 92, 93, 94 e 95 do Regulamento (UE) n.º 1306/2013 do Parlamento Europeo e do Consello, do 17 de decembro de 2013, o importe da axuda, en caso de que o incumprimento se deba a unha acción ou omisión atribuíble directamente ao beneficiario, reducirase ou cancelarse, parcial ou totalmente, dependendo da gravidade, alcance, persistencia e repetición do incumprimento, e o beneficiario deberá reintegrala se procede, conforme o establecido nas citadas disposicións. Para efectos deste control de condicionalidade, as comunidades autónomas deberán dispor de información actualizada sobre as referencias alfanuméricas Sixpac de todas as parcelas que forman parte da explotación do beneficiario.

CAPÍTULO III

Controis e pagamento

Artigo 83. Controis.

1. As actuacións de control serán realizadas conforme o establecido no presente real decreto e, en especial, aplicaranse as disposicións en materia de control fixadas no capítulo IV do Regulamento de execución (UE) 2016/1150 da Comisión, do 15 de abril de 2016.

2. As comunidades autónomas articularán as medidas de control necesarias para garantir o cumprimento das actuacións previstas nun plan xeral de control elaborado polo Fondo Español de Garantía Agraria en coordinación con estas. No caso da reestruturación e reconversión de viña, o plan xeral citado terá en conta o rexistro vitícola da comunidade autónoma correspondente.

3. Como complemento do plan xeral de control que se estableza, as autoridades competentes poderán desenvolver cantas actuacións de control consideren precisas.

4. Para aquelas axudas relacionadas coa superficie, os controis administrativos e sobre o terreo estableceranse tendo en conta os principios xerais do sistema integrado de xestión e control previstos no Regulamento (UE) n.º 1307/2013 do Parlamento Europeo e do Consello, do 17 de decembro de 2013.

5. Antes do 15 de xaneiro de cada ano, as comunidades autónomas remitirán ao Fondo Español de Garantía Agraria un informe anual sobre os controis executados durante o exercicio financeiro anterior respecto a cada medida do programa de apoio utilizando os modelos que figuran no anexo IX.

Artigo 84. *Pagamento.*

O outorgamento e pagamento ou denegación das axudas a que se refire este real decreto corresponde á autoridade competente da comunidade autónoma onde se presente a axuda.

As axudas reguladas neste real decreto financiaranse con cargo ao Fondo Europeo Agrícola de Garantía.

Artigo 85. *Pagamentos indebidos e sancións.*

1. O beneficiario deberá reintegrar os pagamentos indebidos xunto cos xuros, segundo o establecido no artigo 40 do Regulamento de execución (UE) 2016/1150 da Comisión, do 15 de abril de 2016. O tipo de xuro aplicable será o de demora establecido na correspondente Lei de orzamentos xerais do Estado.

2. O incumprimento do disposto neste real decreto será sancionado, logo de instrución do procedemento sancionador, segundo o disposto nos artigos 37 a 45 da Lei 24/2003, do 10 de xullo, e nos artigos 52 a 69 da Lei 38/2003, do 17 de novembro.

Artigo 86. *Comunicación relativa aos anticipos.*

1. Para os anticipos concedidos na medida de promoción en mercados de terceiros países segundo o artigo 14, o beneficiario deberá realizar cada ano ao organismo pagador, antes do 31 de xullo, xunto coa solicitude do pagamento do saldo da anualidade correspondente, unha declaración dos gastos que xustifiquen, o uso dos anticipos na anualidade correspondente e a confirmación do saldo restante do anticipo non utilizado.

2. Para os anticipos concedidos á medida de reestruturación e reconversión de viñas, segundo o artigo 38, os beneficiarios deberán comunicar cada ano ao organismo pagador antes do 31 de outubro unha declaración dos gastos que xustifique o uso dos anticipos até o 15 de outubro correspondente e a confirmación do saldo restante dos anticipos non utilizados na data do 15 de outubro.

3. Para os anticipos concedidos na medida de destilación de subprodutos segundo o artigo 58, o beneficiario deberá realizar cada ano ao organismo pagador, antes do 20 de xullo, xunto coa solicitude do pagamento do saldo, unha declaración dos gastos que xustifiquen o uso dos anticipos no exercicio Feaga correspondente e a confirmación do saldo restante do anticipo non utilizado.

4. Os beneficiarios de operacións para os cales a contribución da Unión sexa inferior a 5.000.000 de euros non estarán obrigados á comunicación relativa aos anticipos establecida nos números 1, 2 e 3 do presente artigo.

5. Os organismos pagadores de cada comunidade autónoma deberán incluír, nas súas contas anuais do exercicio en curso, a información relacionada coa utilización dos anticipos nos prazos fixados.

6. Para os efectos do artigo 27.2 do Regulamento delegado (UE) n.º 907/2014 da Comisión, do 11 de marzo de 2014, sobre liberación da garantía, as probas do dereito á concesión definitiva que se deberán presentar serán a última declaración de gastos e a confirmación do saldo a que se fai referencia nos números 1 a 3 do presente artigo. No caso dos anticipos concedidos para operacións relacionadas coa medida de reestruturación e reconversión de viña, a última declaración de gastos e a confirmación do saldo, facilitaranse ao final do segundo exercicio financeiro posterior ao pagamento.

Artigo 87. *Compatibilidade das axudas.*

1. Non se financiarán cos fondos do Programa nacional de apoio as medidas que están recollidas nos programas de desenvolvemento rural ao abeiro do Regulamento (UE) n.º 1305/2013, relativos á axuda ao desenvolvemento rural, e as medidas que están recollidas no Regulamento (CE) n.º 1040/2002 da Comisión, do 14 de xuño de 2002, polo que se establecen normas particulares de execución das disposicións relativas á asignación dunha participación financeira da Comunidade para a loita fitosanitaria e se

derroga o Regulamento (CE) n.º 2051/97, nin outras medidas financiadas por instrumentos financeiros da Unión Europea.

Tampouco se financiarán cos fondos do Programa nacional de apoio os programas simples de información e de promoción de viño asociado a outros produtos agroalimentarios ou os programas múltiples de información e promoción de viño, regulados ao abeiro do Regulamento (UE) n.º 1144/2014 do Parlamento Europeo e do Consello, sobre accións de información e de promoción relativas a produtos agrícolas no mercado interior e en terceiros países, e polo que se derroga o Regulamento (CE) n.º 3/2008 do Consello.

2. A percepción das subvencións previstas neste real decreto, para financiar a operación presentada, será incompatible coa de calquera outra que, para a mesma finalidade e obxecto, poidan establecer outras administracións públicas ou outros entes públicos ou privados, nacionais ou internacionais.

3. Para os efectos do artigo 27 do Regulamento de execución n.º 2016/1150 da Comisión, do 15 de abril de 2016, as comunidades autónomas garantirán a existencia dun sistema de control eficaz para evitar o dobre financiamento das medidas recollidas no presente real decreto.

Artigo 88. *Erro manifesto.*

Calquera comunicación, solicitude ou petición cursada ás autoridades competentes, en virtude das axudas recollidas neste real decreto, incluída unha solicitude de axuda, poderase corrixir en calquera momento despois da súa presentación en caso de erros manifestos recoñecidos pola autoridade competente.

Disposición adicional única. *Medios e contención do gasto.*

A constitución e o funcionamento da Comisión prevista no artigo 10, e do Comité regulado no artigo 23, non suporán incremento de gasto e serán atendidos cos medios persoais e materiais existentes no Dirección Xeral da Industria Alimentaria do Ministerio de Agricultura e Pesca, Alimentación e Medio Ambiente.

Así mesmo, o resto das medidas previstas neste real decreto non poderán supor incremento de dotacións, nin de retribucións nin doutros gastos de persoal.

Disposición transitoria primeira. *Promoción.*

As comunidades autónomas poderán realizar resolucións complementarias de acordo co previsto no número 2 do artigo 11, para as solicitudes presentadas antes do 15 de febreiro de 2016 e aprobadas consoante o artigo 10.4 b) 2.º do Real decreto 1079/2014, do 19 de decembro, para a aplicación das medidas do programa de apoio 2014-2018 ao sector vitivinícola.

Non obstante o anterior, para efectos das modificacións correspondentes a esas solicitudes, será de aplicación o establecido no artigo 12 do Real decreto 1079/2014, do 19 de decembro.

Disposición transitoria segunda. *Reestruturación e reconversión de viña.*

Respecto da reestruturación e reconversión de viña, aboaranse con cargo aos exercicios 2014 a 2018, as operacións finalizadas en 31 de xullo de 2013, e que non puidesen ser pagadas antes do 15 de outubro de 2013, para o cal os requisitos e condicións serán os establecidos no Real decreto 244/2009, do 27 de febreiro, para a aplicación das medidas do programa de apoio ao sector vitivinícola español.

As medidas aprobadas e non finalizadas en 31 de xullo de 2013 serán liquidadas ou pagadas con cargo aos exercicios 2014 a 2018, conforme os importes e accións recollidos no anexo XII do presente real decreto. As comunidades autónomas poderán determinar que sexan executadas conforme os requisitos e condicións previstos neste real decreto.

Nos casos descritos nos dous parágrafos anteriores, a contribución da Unión Europea para os custos de reestruturación e reconversión de viña non poderá exceder o 75 por

cento nas rexións de converxencia segundo a clasificación do Regulamento (CE) n.º 1083/2006, e do 50 por cento no resto de rexións.

Disposición transitoria terceira. *Investimentos.*

A sección cuarta do Real decreto 548/2013, do 19 de xullo, para a aplicación das medidas do programa de apoio 2014-2018 ao sector vitivinícola español, seguirá sendo de aplicación para as solicitudes da medida de investimentos presentadas até o 1 de febreiro de 2015.

Non obstante, o apoio aos proxectos de investimento cuxo obxecto sexa coincidente co determinado no artigo 50 do Regulamento (UE) n.º 1308/2013 do Parlamento Europeo e do Consello, do 17 de decembro de 2013, polo que se crea a organización común de mercados dos produtos agrarios, será regulado exclusivamente a través do Regulamento (UE) n.º 1305/2013 do Parlamento Europeo e do Consello, do 17 de decembro de 2013, relativo á axuda ao desenvolvemento rural a través do Fondo Europeo Agrícola de Desenvolvemento Rural (Feader) e polo que se derroga o Regulamento (CE) n.º 1698/2005 do Consello.

Disposición transitoria cuarta. *Normativa aplicable.*

As disposicións do Real decreto 1079/2014, do 19 de decembro, seguirán sendo aplicables ás solicitudes presentadas antes do 18 de xullo de 2016 en virtude dos artigos 8, 25, 48, 58 e 71 dese real decreto.

As comunidades autónomas velarán por que as medidas ás cales se sigan aplicando as disposicións do real decreto citado se identifiquen claramente mediante un sistema de xestión e control.

Disposición transitoria quinta. *Referencias normativas.*

As referencias contidas neste real decreto á Lei 39/2015, do 1 de outubro, do procedemento administrativo común das administracións públicas, e á Lei 40/2015, do 1 de outubro, de réxime xurídico do sector público, para as solicitudes presentadas con anterioridade ao 2 de outubro de 2016, entenderanse feitas, segundo proceda, á Lei 30/1992, do 26 de novembro, de réxime xurídico das administracións públicas e do procedemento administrativo común, e á Lei 11/2007, do 22 de xuño, de acceso electrónico dos cidadáns aos servizos públicos.

Disposición derogatoria única. *Derrogación normativa.*

Queda derogado o Real decreto 1079/2014, do 19 de decembro, para a aplicación das medidas do programa de apoio 2014-2018 ao sector vitivinícola español.

Disposición derradeira primeira. *Título competencial.*

Este real decreto dítase ao abeiro do disposto no artigo 149.1.13.^a da Constitución, que atribúe ao Estado a competencia exclusiva en materia de bases e coordinación da planificación xeral da actividade económica, salvo a sección primeira do capítulo II, que se dita ao abeiro do disposto no artigo 149.1.10.^a da Constitución, que atribúe ao Estado a competencia exclusiva en materia de comercio exterior.

Disposición derradeira segunda. *Facultade de modificación.*

Facúltase o ministro de Agricultura e Pesca, Alimentación e Medio Ambiente para modificar o contido dos anexos do presente real decreto cando tales modificacións sexan exixidas como consecuencia da normativa da Unión Europea. Ademais, poderá modificar as datas e os prazos contidos na presente disposición.

Disposición derradeira terceira. *Deber de información.*

O Ministerio de Agricultura e Pesca, Alimentación e Medio Ambiente e as comunidades autónomas proporcionaranse, preferentemente por vía electrónica, a información necesaria para facilitar o seguimento das disposicións contidas neste real decreto.

Disposición derradeira cuarta. *Entrada en vigor e aplicación.*

O presente real decreto entrará en vigor o día seguinte ao da súa publicación no «Boletín Oficial del Estado», e será de aplicación desde o 18 de xullo de 2016.

Dado en Madrid o 5 de decembro de 2016.

FELIPE R.

A ministra de Agricultura e Pesca, Alimentación e Medio Ambiente,
ISABEL GARCÍA TEJERINA

ANEXO I

Accións e actividades de promoción

Accións	Actividades
a) Relacións públicas e medidas de promoción e publicidade que destaquen en particular as vantaxes dos produtos da Unión Europea en termos de calidade, seguranza alimentaria e respecto polo ambiente.	Misións comerciais. Campañas publicitarias de natureza diversa (TV, radio, prensa, eventos etc.). Promocións en puntos de venda. Portais web para promoción exterior. Misións inversas. Oficinas de información. Gabinete de prensa. Presentacións de produto.
b) Participación en manifestacións, feiras e exposicións de importancia internacional.	Feiras e exposicións internacionais, etc., sectoriais ou xerais, profesionais e de consumidores.
c) Campañas de información , en particular, sobre os sistemas da Unión Europea de denominacións de orixe, indicacións xeográficas e produción ecolóxicas.	Encontros empresariais, profesionais, líderes de opinión e consumidores. Xornadas, seminarios, catas, degustacións, etc.
d) Estudos de novos mercados , necesarios para a procura de novas saídas comerciais.	Estudos e informes de mercado.
e) Avaliación dos resultados das medidas de promoción e información.	Estudos de avaliación de resultados das medidas de promoción. Auditorías de execución de medidas e gastos das operacións.

ANEXO II

Lista de produtos

Os produtos mencionados no artigo 6 son os seguintes:

1. Viño.
2. Viño de licor.
3. Viño espumoso.
4. Viño espumoso de calidade.
5. Viño espumoso aromático de calidade.
6. Viño de agulla.
7. Viño de agulla gasificado.
8. Viño de uvas pasificadas.
9. Viño de uvas sobremaduras.
10. Viños ecolóxicos.

ANEXO III

Lista de países prioritarios

GRUPO 1:

Estados Unidos.
Canadá.
Xapón.
China (incluídos Hong Kong e Taiwán).
Suíza.
Rusia.
México.

GRUPO 2:

Corea do Sur.
 Brasil.
 Noruega.
 Australia.
 Perú.
 Colombia.
 Singapur.
 República Dominicana.
 Cuba.
 Costa Rica.
 Panamá.

GRUPO 3:

India.
 Malaisia.
 Filipinas.
 Vietnam.
 Porto Rico.
 Tailandia.

ANEXO IV

I. Formulario de beneficiario

Cubrir un único formulario por beneficiario

1	BENEFICIARIO
1.1	Presentación <i>Nome, enderezo e enderezo de correo electrónico, teléfono, fax, persoa de contacto responsable do programa.</i>
1.2	Tipo de beneficiario (de acordo co artigo 5 do presente real decreto)
1.3	Trátase dun novo beneficiario? SI/NON
1.4	Características da organización ou empresa proponentes. <i>Representatividade, importancia no sector, volume de comercialización global e respecto á DOP/IXP a que pertence</i>
1.5	Tipo da empresa – <i>Especifíquese se se trata dunha entidade asociativa prioritaria ou dunha entidade de base desta.</i> – <i>Especifíquese se se trata dunha entidade resultante dun proceso de integración acollida ao Real decreto 1009/2015, do 6 de novembro, nos dous últimos anos anteriores á solicitude</i>
1.6	Trátase dunha empresa/grupo empresarial? SI/NON <i>En caso afirmativo, especifíquese diagrama do grupo empresarial (indicando porcentaxes) e cales son as adegas do grupo que participan no programa.</i>
2.	Acreditación da DISPOÑIBILIDADE DE RECURSOS SUFICIENTES
2.1	Balance de contas Copia das declaracións financeiras e/ou informes anuais dos 3 últimos anos
2.2	<i>Xustificación da dispoñibilidade de fondos suficientes para atender a parte do orzamento para a cal se solicita cofinanciamento</i>
3	Acreditación da capacidade técnica
3.1	Descrición dos recursos para a execución do programa (persoal e medios) Definir estrutura interna/externa (departamentos e funcións) <i>Especifíquese se os recursos son propios ou alleos.</i> <i>Se se seleccionaron varios organismos de execución, indíquense as actuacións que aplicará cada un deles.</i>
3.2	Xustificación da capacidade para executar o programa (experiencia en actuacións de promoción)
4.	Capacidade DE RESPONSA COMERCIAL
4.1	Diversidade de tipos de viño e zonas xeográficas en que está presente. Indíquense as marcas comerciais dos diferentes tipos de viños

4.2	Volumen de comercialización e volumen exportado dos tres últimos anos (<i>detallando o volumen para os países obxecto do programa</i>)
4.3	Volumen de comercialización dispoñible para posible resposta comercial

II. Formulario de programa

Cubrir un formulario para cada programa	
1	CARACTERÍSTICAS DO PROGRAMA
1.1	Produto(s) <i>Especifíquense os produtos obxecto de promoción dos recollidos no anexo II</i>
1.2	Destino dos programas <i>Especifíquense os países ou rexións de terceiro país de destino e detalle os motivos por que foron seleccionados e as posibilidades de comercialización dos produtos nos destinos elixidos.</i>
1.3	Trátase dun programa dirixido a un novo destino? SI/NON En caso afirmativo especifíquense o(s) novo(s) país(es) ou rexión(s) de terceiro(s)país(es)de destino
1.4	Duración: 12-24-36 meses
1.5	É continuación dun programa presentado no exercicio anterior? SI/NON
1.6	Trátase dunha prórroga? SI/NON
2	OBXECTIVO <i>En termos de obxectivos concretos e, se for posible, cuantificados</i>
3	ESTRATEGIA <i>Especifíquese que instrumentos de márketing e comunicación se utilizarán para alcanzar os obxectivos do programa</i>
4	ACCIÓNS
4.1	Descrición detallada cada unha das accións e actividades por país ou rexión.
4.2	Calendario previsto <i>Lugares e datas onde se levarán a cabo as actividades (menciónese a cidade ou, en casos excepcionais, a rexión; por exemplo, «Estados Unidos» non é o suficientemente preciso).</i>
5	PÚBLICO OBXECTIVO <i>Especifíquese se vai dirixido ao consumidor, a distribuidores (supermercados, grosistas, retalistas especializados, abastecedores, restaurantes), a importadores, a líderes de opinión (xornalistas e expertos gastronómicos), a escolas de gastronomía e restauración ...</i>
6	MENSAXES <i>Sobre as calidades intrínsecas dos produtos ou, en caso de tratarse de viños que contan cunha IXP/DOP, a orixe do produto</i>
7	REPERCUSIÓN PREVISIBLE E MÉTODO PARA MEDILA <i>Polo que se refire á evolución da demanda, a notoriedade e a imaxe do produto ou calquera outro aspecto vinculado aos obxectivos.</i>
7.1	<i>Especifíquese e cuantifíquese a repercusión previsible en termos de resultados realistas.</i>
7.2	<i>Especifíquese o método (cuantitativo e/ou cualitativo) e os indicadores que se utilizarán para medir os resultados ou repercusións</i>
8	INTERESE NACIONAL E COMUNITARIO DO PROGRAMA
9	ORZAMENTO
9.1	Cadro recapitulativo <i>Elaborar un cadro recapitulativo para cada país de destino e exercicio. A presentación do orzamento débese ater á mesma estrutura e á mesma orde que a descrición das actividades. Véxase o modelo do anexo IV orzamento recapitulativo</i>
9.2	Xustificación de que os custos propostos non superan os prezos normais de mercado. <i>En particular, a través da comparación de diferentes ofertas.</i>
10	OUTROS DATOS PERTINENTES

III. Declaracións obrigatorias

- a) Compromiso da organización ou empresa propoñentes de garantir o seu financiamento para toda a duración do programa.
- b) Declaración da organización ou empresa propoñentes de non ter solicitado nin recibido axudas incompatibles.

IV. Orzamento recapitulativo

Acción	Actividade	Exercicio I Anualidade I	Exercicio II Anualidade II	Exercicio III Anualidade III	Total
a)					
b)					
c)					
d)					
e)					
Gastos administrativos * (max. 4% do total de accións subvencionables)					
Custos de persoal (13%)					
Total					

* Poderán incluír os custos do certificado dos estados financeiros.

ANEXO V

Criterios de priorización

	Puntuación máxima
1. Características do propoñente:	
a) Programas presentados por novos beneficiarios	25 puntos
b) Entidade asociativa prioritaria ou entidade de base pertencente a ela ou entidade resultante dun proceso de integración	5 puntos
c) Beneficiarios que sexan produtores vitivinícolas	10 puntos
2. Características do programa:	
a) Programas que teñan como obxectivo un novo país ou rexión de terceiro país	20 puntos
b) Destino dos programas	15 puntos
c) Alcance e cobertura do programa	15 puntos
3. Interese para a comunidade autónoma:	
a) Criterio que decidirá cada comunidade autónoma	10 puntos
Valoración total xeral	100 puntos

1. Características do propoñente.

a) Programas presentados por novos beneficiarios (25 puntos), entendendo como tales aqueles que non participasen nunca ou cuxos programas nunca fosen seleccionados no marco desta medida

b) Entidades asociativas prioritarias ou entidade de base pertencente a ela, recoñecida para o sector do viño, de acordo co Real decreto 550/2014, do 27 de xuño, polo que se desenvolven os requisitos e o procedemento para o recoñecemento das entidades asociativas prioritarias e para a súa inscrición e baixa no Rexistro Nacional de Entidades Asociativas Prioritarias, previsto na Lei 13/2013, do 2 de agosto, de fomento da integración de cooperativas e doutras entidades asociativas de carácter agroalimentario, ou as entidades resultantes dun proceso de integración acollida ao Real decreto 1009/2015, do 6 de novembro, nos dous últimos anos anteriores á solicitude (5 puntos).

c) Beneficiarios que sexan produtores vitivinícolas: entendendo como tales aqueles que, independentemente da súa forma xurídica, sexan elaboradores de viño (comercialicen ou non) (10 puntos).

2. Características do programa.

a) Programas que teñan como obxectivo un novo terceiro país ou nova rexión dun terceiro país, para o solicitante (20 puntos):

Puntuaranse unicamente os programas ou a parte dos programas dirixidos a terceiros países ou rexións de terceiros países que nunca antes fosen seleccionados para un determinado beneficiario. A puntuación repartirase de forma proporcional á porcentaxe de orzamento destinada aos novos países ou rexións, correspondendo os 20 puntos só aos programas en que estes destinos supoñan o 100% do orzamento.

b) Destino dos programas (15 puntos):

Os 15 puntos repartiranse segundo o grupo ou grupos de países do anexo III a que pertencen os destinos elixidos para desenvolver os programas.

A repartición da puntuación farase con base na porcentaxe de orzamento destinado ao ditos grupos de países prioritarios, asignando a puntuación da seguinte maneira, segundo proceda:

- Se ao menos o 75% do orzamento está dirixido a países do grupo 1: mínimo 10 puntos; incrementando 1 punto até chegar aos 15 puntos por cada 5% de incremento no orzamento neses destinos.

- Se ao menos o 75% do orzamento está dirixido a países dos grupos 1 e/ou do 2: mínimo 5 puntos; incrementando 1 punto até chegar aos 10 puntos por cada 5% de incremento no orzamento neses destinos.

- Se ao menos o 75% do orzamento está dirixido a países dos grupos 1, e/ou do 2 e/ou do 3: máximo 5 puntos; concederase 1 punto até chegar aos 5 puntos por cada 5% de incremento no orzamento neses destinos.

- Programas con menos do 75% do orzamento nos países prioritarios até un máximo de 3 puntos: 1 punto se o orzamento neses destinos supón entre o 1-24%, 2 puntos se supón entre o 25-49% e 3 puntos se supón entre 50-74%.

c) Alcance e cobertura do programa (15 puntos):

- A puntuación concederase da seguinte forma:

- 7,5 puntos en función do alcance e cobertura en termos de actividades previstas: dúas actividades = 2,5 puntos, tres actividades = 5 puntos, catro ou máis = 7,5 puntos.

- 7,5 puntos en función do alcance e cobertura en termos de grupo destinatario (número de contactos previstos, etc.), entendendo por grupo destinatario: distribución, restauración, consumidor final distribuidor importador e líderes de opinión. Dous destinatarios = 2,5 puntos, tres destinatarios = 5 puntos, catro ou máis destinatarios = 7,5 puntos, catro.

3. Interese para a comunidade autónoma:

a) Criterio que decidirá a comunidade autónoma (10 puntos).

Só serán de aplicación aqueles criterios que estean baseados nunha estratexia territorial para o sector do viño, compatible coa estratexia e obxectivos previstos no Programa nacional de apoio presentado á Comisión Europea por España. Ademais, deberán cumprir o establecido no artigo 11.2 do Regulamento delegado (UE) 2016/1149 da Comisión, do 15 de abril de 2016; en particular, deberán ser obxectivos e non discriminatorios e non poderán estar vinculados coa localización territorial do beneficiario ou as súas instalacións nin ir en contra das prioridades establecidas pola Comisión para a medida de promoción.

ANEXO VII

Condicións para a subvencionabilidade dos custos de persoal, gastos administrativos e outros

a) Custos de persoal dedicado en exclusiva ás actividades de promoción. Deberán demostrar a relación contractual coa empresa, mediante os datos do contrato, cotización á Seguridade Social a cargo da empresa e os impostos persoais da renda (IRPF). Tanto se é persoal técnico como administrativo, deberase demostrar a dedicación en exclusiva ás actividades de promoción establecidas no programa aprobado.

b) Custos de persoal non dedicado en exclusiva ás actividades de promoción: deberán demostrar a relación contractual coa empresa mediante os datos do contrato, cotización á Seguridade Social e o IRPF. Ademais, deberán achegar as correspondentes táboas horarias onde se indique a categoría profesional, o número de horas de dedicación, o custo horario e o custo total, ben como unha certificación do responsable de persoal da empresa que acredite a relación do traballador co programa aprobado. Avaliarase a coherencia das táboas co programa e subvencionarase unicamente o importe xustificado mediante tales táboas.

A suma das alíneas a e b (custos de persoal) non poderá superar o 13% do total de custos das accións executadas; por este motivo eses gastos deberán figurar convenientemente desagregados no orzamento recapitulativo do programa que se presente.

O beneficiario deberá presentar xustificantes que expoñan os detalles do traballo realmente efectuado en relación coa operación concreta ou con cada medida ou acción subxacente, se procede.

Para efectos da determinación dos custos de persoal relacionados coa execución dunha operación por parte do persoal permanente do beneficiario, poderase calcular a tarifa horaria aplicable dividindo por 1.720 horas os últimos custos salariais anuais brutos documentados dos empregados concretos que traballasen na execución da operación.

c) Gastos administrativos: serán subvencionables até un límite dun 4 por cento dos custos subvencionables totais de execución das actividades promocionais e incluírán, se for o caso, os gastos correspondentes ao certificado dos estados financeiros, recollido no artigo 15.7. Estes gastos, para seren subvencionables, deberán estar previstos como unha partida específica no orzamento recapitulativo do programa. Xustificaranse mediante un certificado do beneficiario que acredite eses gastos de administración e xestión do programa aprobado.

d) Aloxamento, manutención e comidas colectivas.

- Aboarase unha axuda de custo máxima polo aloxamento: 120 euros/ día en España e 180 euros día en terceiros países, logo de presentación das facturas pagadas.

- Aboarase unha axuda de custo global por estadía de 80 euros ao día en España e de 90 euros ao día en terceiros países para cubrir todos os demais gastos (comidas, transporte local, teléfono, etc.).

- Estas axudas de custo aboaranse pola participación en eventos fóra do lugar de traballo e cubrirán o número de días necesario para a realización da actividade. Para comidas colectivas aboarase un importe máximo de 60 euros/persoa en España e 70 euros/persoa en terceiros países logo de presentación de facturas.

e) Viño que se vaia empregar como material promocional: no caso de catas, misións inversas e similares será dun máximo dunha botella por cada 6 participantes.

ANEXO VIII

Relación de gastos non subvencionables

- Provisións para futuras posibles perdas ou débedas.
- Gastos de transporte en taxi ou transporte público, cubertos polas axudas de custo diarias.
 - Gastos bancarios, xuros bancarios ou primas das pólizas de seguros. Entre tales gastos encóntranse, en particular, os gastos de constitución e mantemento dos avais bancarios que responden como garantía.
 - Perdas por cambio de divisas.
 - No caso de que se repita ou solicite unha prórroga para realizar o programa de promoción no mesmo país, non se poderán incluír gastos de actividades promocionais xa solicitadas no programa anterior (ex. custos de creación de páxinas web, anuncios de televisión e radio, elaboración de material audiovisual, estudos de mercado, etc.).
 - Gastos que estean fóra do obxecto do programa
 - Creación e rexistro de marcas.
 - Gastos equivalentes a descontos comerciais, nin os asimilables a axudas directas ao produtor.
 - Con carácter xeral, os tributos só se poderán considerar gastos subvencionables cando o beneficiario os aboe efectivamente. En ningún caso se considerarán gastos subvencionables os impostos indirectos cando sexan susceptibles de recuperación ou compensación. Queda, por tanto, excluído o financiamento do imposto sobre o valor engadido (IVE) ben como o imposto xeral indirecto canario (IXIC) na medida en que sexan deducibles.

2. Resultados dos controis

Organismo pagador	RESULTADOS DOS CONTROIS										Contia da redución da axuda Regulamento (UE) nº 1306/2013 Art. 64			
	Controis administrativos					Controis sobre o terreo					Despois de controis administrativos	Despois de controis sobre o terreo	Redución total da axuda despois dos controis administrativos e sobre o terreo	
	Nº de solicitudes de axuda con irregularidades (2) detectadas polo control administrativo	Importe das irregularidades detectadas polo control administrativo (3)	Porcentaxe de erro por importe	Número de solicitudes de axuda con irregularidades		Importe das irregularidades		Porcentaxe de erro						
				Detectado na mostra baseada no risco	Detectado na mostra aleatoria	Detectado na mostra baseada no risco	Detectado na mostra aleatoria	En función do risco	Aleatoria					
número	EUR	%	número	número	EUR	EUR	EUR	%	%	EUR	EUR	EUR		
O	P	Q = P/J	R	S	T	U	V=T/L	W=U/N	X=P	Y=T+U	σ=X+Y			
Total														

(*) Prazo de notificación ao FEGA: 15 de xaneiro.

(**) Deberase cubrir unha notificación para cada unha das medidas do programa de apoio.

- (1) O termo «unidades» refírese, segundo proceda, ao número de operacións, hectáreas, toneladas, litros, etc. en función da medida/operación/acción.
- (2) Neste contexto, o termo «irregularidade» enténdese que inclúe calquera constatación, anomalía ou diverxencia que dea lugar a un cambio no importe aboado ou que se tería aboado antes da aplicación de penalizacións.
- (3) • Se o control administrativo detecta unha irregularidade e a mesma solicitude de axuda tamén é obxecto dun CST que non detecta ningunha outra irregularidade, a irregularidade débese atribuír ao control administrativo.
 - Se un control administrativo detecta unha presunta irregularidade e, para afondar na investigación, se programa a seguir un CST que confirma a presunta irregularidade, esta débese atribuír ao control administrativo.
 - Se un control administrativo detecta unha irregularidade e un CST da mesma solicitude de axuda detecta unha nova irregularidade, as dúas irregularidades débense contabilizar por separado.
- (4) En caso de controis do 100 %, consígnese todo nos CST «en función do risco».

ANEXO X

Necesidades de financiamento para a reestruturación e reconversión de viña para o exercicio orzamentario: 20.....

Comunidade autónoma:

Data de comunicación:

Superficie afectada (ha)	Importe total (€)

Comunicación de acordo co número 1 do artigo 32 do presente real decreto

ANEXO XI

Pagamentos en 20 de xuño e necesidades de fondos até o 15 de outubro

Comunidade autónoma:

Data de comunicación:

Pagamentos*		Necesidades de fondos até o 15 de outubro**	
Superficie afectada (ha)	Importe total (€)	Superficie afectada (ha)	Importe total (€)

* Pagamentos: realizados polo organismo pagador no exercicio financeiro en curso, referidos ao venres da semana inmediatamente anterior á data do 20 xuño

** Necesidades de fondos até o 15 de outubro: indicaranse as necesidades para todo o exercicio financeiro

Comunicación de acordo co artigo 35 do presente real decreto

ANEXO XII

Accións subvencionables en reestruturación e reconversión de viñas

Actividade	Acción	Importe máximo subvencionable
A) Reimplantación de viñas	• Arrinca (incluída a recolla de cepas)	430 €/ha
	• Preparación do solo	1.400 €/ha
	• Preparación do solo para a plantación en covas («hoyos») na illa de Lanzarote ¹	4.200 €/ha
	• Preparación do solo para a plantación en gabias («zanjas») na illa de Lanzarote ²	2.350 €/ha
	• Reposición de cinza volcánica («picón») ³	5.100 €/ha
	• Desinfección	2.000 €/ha
	• Despedregado	400 €/ha
	• Nivelación do terreo	800 €/ha
	• Construción de socalcos	19.000 €/ha
	• Construción de socalcos con muras de pedra en pendentes maiores do 30%	30.000 €/ha
	• Planta e plantación	1,69 €/planta
	• Tubos de plástico que rodean a planta para protección contra coellos no momento da plantación (incluída a colocación)	0,5 €/unidade
	• Sistemas de condución (incluída colocación)	
	• Espaller	3.400 €/ha
	• Estacada	5.000 €/ha
• Parra ou semellantes	15.000 €/ha	
• Parral baixo Canarias	8.300 €/ha	
• Elevación individualizada ⁴	1 €/unidade	
B) Reconversión de viñas	• Sobreenxertía	0,9 €/unidade
C) Mellora de técnicas de xestión de viñas	• Cambio de vaso a espaller ou a outro sistema de condución	600 €/ha + sistema de condución

¹ É excluínte coa operación de preparación do solo.

² É excluínte coa operación de preparación do solo.

³ Operación ligada exclusivamente ás operacións 3 e 4.

⁴ Exclusivamente Comunidade Autónoma de Galicia, País Vasco e Canarias.

ANEXO XIII

Necesidades de financiamento para a replantación por motivos sanitarios ou fitosanitarios para o exercicio orzamentario: 20.....

Comunidade autónoma:

Data de comunicación:

Superficie afectada (ha)	Importe total (€)

ANEXO XIV

Solicitud de axuda á destilación de subprodutos

(Art. 52 do Regulamento (UE) nº 1308/2013)

DESTILADOR (Cubrir ou pór etiquetas)	PRODUTOR (Cubrir ou pór etiquetas)
APELIDOS E NOME e/ou RAZÓN SOCIAL	APELIDOS E NOME e/ou RAZÓN SOCIAL
DNI / NIF	DNI/NIF.....
DOMICILIO: RÚA.....	R.I.A.....
LOCALIDADE e/ou MUNICIPIO.....	DOMICILIO: RÚA.....
PROVINCIA..... C.P.....	LOCALIDADE e/ou MUNICIPIO.....
CÓDIGO DE ACTIVIDADE E ESTABLECEMENTO (CAE) DO DESTILADOR.....	PROVINCIA.....
	.C.P.....
	ADEGA (de elaboración) CÓDIGO DE ACTIVIDADE E ESTABLECEMENTO (CAE)
	N.I.D.P.A.....
	ZONA VITÍCOLA.....

D..... con NIF..... en calidade de (1)do destilador indicado realizou a destilación de subprodutos do artigo 52 do Regulamento (UE) nº 1308/2013 correspondente ao produtor identificado no cadro superior, que entregou para a súa destilación os produtos que se xustifican na relación que se xunta, téndose obtido o alcohol que se detalla no cadro inferior.

Por todo isto,

SOLICITA:

Percibir a axuda que lle puiden corresponder para as citadas cantidades de alcohol obtido da destilación indicada, unha vez realizada a destilación conforme o regulamentariamente establecido e presentando xunto con esta solicitude a documentación disposta no número 2 do artigo 57 do presente real decreto.

ALCOHOL OBTIDO	
MATERIA PRIMA	HECTÓGRADOS
BAGAZO	
BORRAS	
VIÑO	
TOTAL	

Que se lle aboe o importe correspondente ao anticipo previsto (80% do importe inicial da axuda) pola destilación realizada, presentando xustificante de depósito dunha garantía correspondente ao 100% do valor de tal anticipo e comprometéndose a comunicar e xustificar o destino do citado alcohol e, se for o caso, o aboamento dos gastos de transporte ao produtor. Así mesmo, comprométese a proceder ao reintegro da axuda se o alcohol non se utilizase exclusivamente con fins industriais ou enerxéticos, e debe ser ingresada na conta e entidade indicada máis adiante.

..... de..... de.....

POLO DESTILADOR,

Asdo.:

SR. DIRECTOR XERAL.....

ANEXO XV

Custos non considerados subvencionables na medida de innovación

1. Os gastos e pagamentos que fosen realizados con anterioridade á presentación da solicitude e con posterioridade á data de xustificación
2. Os debidos á aplicación do imposto sobre o valor engadido (IVE) excepto se este imposto non é recuperable de conformidade coa lexislación aplicable sobre o IVE, cando sexa custeado de forma efectiva e definitiva por un beneficiario distinto do suxeito pasivo mencionado no artigo 13, número 1, parágrafo primeiro, da Directiva 2006/112/CE do Consello.
3. Gastos financeiros, derivados do pagamento aprazado de investimentos ou doutros motivos.
4. Investimentos en equipamentos ou instalacións usadas.
5. Os investimentos de mera substitución
6. A investigación básica e aplicada
7. Os gastos realizados fóra da conta única.

ANEXO XVI

Criterios de valoración na medida de innovación

CRITERIOS DE VALORACIÓN	Puntuación máxima
1. Características do solicitante:	
1.1 Entidade resultante dun proceso de integración acollida ao Real decreto 1009/2015, do 6 de novembro, nos dous últimos anos anteriores á solicitude.	5 puntos
1.2 Entidade asociativa prioritaria, ou entidade de base pertencente a ela, recoñecida, para o sector do viño, de acordo co Real decreto 550/2014, do 27 de xuño, polo que se desenvolven os requisitos e o procedemento para o recoñecemento das entidades asociativas prioritarias e para a súa inscrición e baixa no Rexistro Nacional de Entidades Asociativas Prioritarias, previsto na Lei 13/2013, do 2 de agosto, de fomento da integración de cooperativas e doutras entidades asociativas de carácter agroalimentario.	10 puntos
1. Subtotal.	15 puntos
2. Características do proxecto e do investimento:	
2.1 O proxecto ten como obxectivo o desenvolvemento de novas presentacións de produto ou procesos de envasamento.	10 puntos
2.2 O proxecto ten como obxectivo o desenvolvemento de estratexias de mellora do proceso produtivo (excluídos os aspectos mencionados nos criterios 2.1, 2.3 e 2.5).	10 puntos
2.3 O proxecto ten como obxectivo o desenvolvemento de novos sistemas de transporte, almacenamento e conservación.	10 puntos
2.4 O proxecto ten como obxectivo a valorización de subprodutos en produtos derivados.	10 puntos
2.5 O proxecto ten como obxectivo o desenvolvemento de tecnoloxía para a mellora da eficiencia enerxética, a redución do consumo hídrico ou a mellora no tratamento e/ou na xestión de residuos	20 puntos
2.6 O proxecto inclúe un elemento de transferencia de coñecementos	15 puntos
2.7 O proxecto garante a participación dun centro de investigación e desenvolvemento.	15 puntos
2.8 O proxecto realízase na súa totalidade en territorio insular.	3 puntos
2. Subtotal.	93 puntos
TOTAL	103 puntos

ANEXO XVII

Lista priorizada para a medida de innovación

LISTA PROVISORIA DE PROXECTOS DE INNOVACIÓN SELECCIONADOS POLA COMUNIDADE AUTÓNOMA						PUNTUACIÓN														
COMUNIDADE AUTÓNOMA																				
Nº de proxecto	NIF	Nome e apelidos ou razón social do beneficiario				Orzamento total Feaga exercicio 2018														

ANEXO XVIII

Modelo de datos para a medida de innovación

SOLICITANTE / BENEFICIARIO

TIPO	<ul style="list-style-type: none"> - SOCIEDADES CIVÍS PARTICULARES - COMUNIDADE DE BENS - PERSOA XURÍDICA: <ul style="list-style-type: none"> • COOPERATIVA • OUTRAS: S.A.T <li style="padding-left: 40px;">S.A. <li style="padding-left: 40px;">S.L. <li style="padding-left: 40px;">Outras - Organizacións de produtores de viño, recoñecidas de acordo co artigo 152 do Regulamento (UE) nº 1308/2013 do Parlamento Europeo e do Consello, do 17 de decembro de 2013 - Asociación temporal ou permanente de dous ou máis produtores
IDENTIFICACIÓN	<ul style="list-style-type: none"> - NIF - Domicilio social - Domicilio fiscal
SOLICITUDE	
IDENTIFICACIÓN	<ul style="list-style-type: none"> - DATA DE PRESENTACIÓN <ul style="list-style-type: none"> • Admitida • Non admitida - DATA DE RESOLUCIÓN - DATA DE ACEPTACIÓN, RENUNCIA OU DESISTENCIA - DATA DE PAGAMENTO POR ANUALIDADE - Pagamento final
PROXECTO	
PROXECTO	<ul style="list-style-type: none"> - OBXECTIVO FINAL - ANUAL OU PLURIANUAL: - ORZAMENTO POR ANUALIDADE - AXUDA POR ANUALIDADE
CARACTERÍSTICAS DO INVESTIMENTO	<ul style="list-style-type: none"> - PRODUTOS: <ul style="list-style-type: none"> • MENCIONADOS NO ANEXO VII, PARTE II • RELACIONADOS COS MENCIONADOS NO ANEXO VII, PARTE II
MODIFICACIÓNS	<ul style="list-style-type: none"> - DATA DA SOLICITUDE - CALENDARIO DE EXECUCIÓN - ORZAMENTO Á ALZA SEN MODIFICAR SUBVENCIÓN - ORZAMENTO Á BAIXA CON REDUCIÓN DA SUBVENCIÓN

ANEXO XIX

Datos mínimos que remitirá a comunidade autónoma

Comunidade autónoma:

Exercicio financeiro:

Data de comunicación:

NIF	Superficie solicitada	Volumen de viño estimado de retirada	Axuda estimada (€/ha)	Axuda estimada total (€)